


廣州府志

ル 5
1212
42





門 儿 58
張 1212
卷 42



廣州府志卷一百十六

列傳五 明 南海

陳錫 祖觀 父珙 弟鏊

唐澤 孫之燦

黃重

陳則 父英 孫世善 曾孫誠

鄺約 父瑄 子元陽 姪元

方獻夫 祖權 父遂

張祐

梁廷振 梁方

曾俊 子應珪 孫士鑑

盧津 子宁

霍韜 子與璞等

霍任 弟傑 霍敦

梁焯

許士經

陸任忠 羅汝涇

李文充

吳宗湯

李紹敏 子光宸 兄子光寅

陳激衷

陳澤

廣州府志卷一百十六

列傳五

何維柏

洗桂奇

劉模

陳善

侯天錫

子國治

孫勳

龐嵩

子一夔 一德

吳旦

父章

盧夢陽

馬拯

陳紹儒

霍與瑕

孫裔興

弟振興 孫光祚

嗣興

子蕙

李光宸

明

陳錫字祐卿號天游南海沙貝人宋朝散大夫陳康延之後祖觀字思賢生四歲而孤稍長學諸子百家書強記數千言不求聞達四方髦士多就講學尤長于詩年八十六卒有滄江集傳于世父珙字伯玉以戴記授徒為上猶訓導以身率

諸生時張弼知南安府甚加禮敬錫少力學宏治十一年戊午鄉薦十八年乙丑進士授戶部主事嘗司廩劉瑾用事羣璫列中外雖東芻出納亦混主計錫以法繩之眾不敢肆司漕通州革弊改六條人以為便轉員外郎調吏部稽勳司陞郎中舍人朱麒求襲封保國公錫駁之曰洪武之約非有重大軍功不得封爵襲蔭今朱麒襲公非約也宜從始封伯爵尚書楊一清從其議因著為令正德十二年遷福建參政厯左布政綏定叛軍鈎稽乾沒樹立風紀綽有令聞擢應天府尹去之日閩人為立遺愛亭居應天未及三載廷議欲晉孤卿錫竟請致仕凡三疏得允優游田園凡十餘年始卒年八十有一賜祭葬祀福建名宦郡人祀之鄉賢祠弟鏊能詩以子紹儒考績封戶部郎中累贈太常寺卿

據李義壯撰傳修

唐澤字加民少孤家貧力學登宏治十一年戊午賢書正德
間授新淦令時工役繁興澤以愛民惜用爲念遷粵西鳳化
令兵備副使傅習重之舉軍前掌理錢穀與征平修荔之功
除峽江之暴免不急之征革兌糧之數西土賴之將陞遂解
官歸子資賢嘉靖戊午歲貢以其子之燦貴封司務之燦字
道宣弱冠登嘉靖十一年戊午賢書會試乙榜授侯官教諭
甲子聘典浙試晉國子學正秩滿晉吏部司務兩得恩誥上
榮所尊以外艱歸卒孫輝歲貢四代科名稱最盛云據金通志修
黃重字子任宏治十四年辛酉鄉薦正德三年戊辰進士授
行人丁外艱歸服闋復職七年壬申使伊藩葬祭事竣卻其
金帛鞍馬癸酉使遼東卻鎮巡例贈甲戌以績最擢戶科給
事中巡視內十庫光祿寺宿弊俱革已而清理畿內倉場權

貴避焉十二年左都御史彭澤坐夷情削籍重奏請寬宥以
昭往功時論驕之進兵科右給事中考選京衛武官罔弗當
者會武宗北巡迎駕有勞賜金幣疏乞歸省復賜寶鏹行庚
辰復任尋丁內艱歸嘉靖二年癸未起補吏科右給事中市
魁李鳳陽挾中官勢爲奸利方付刑部俄改錦衣獄尙書林
俊執奏不聽乃上慎政令以圖治安疏會災異修省復疏詔
令不常爵賞太濫聽言不宏營建不節言甚剴切聞者危之
甲申夏進兵科左給事中劾太監潘真出鎮荆湖違例丐請
秋以言禮杖于午門外尋進戶科都給事中賜金幣寶鏹丙
戌充武舉考官丁亥畿內飢疏請賑濟詔行其言多賴全活
入侍經筵擢南京太常寺少卿先是三擬進秩皆不報久乃
獲遷己丑星變以自陳致仕時同年呂柟謫金陵嘗書喬岳

大川氣象青天白日襟懷以贈歸構草堂刻栴書以自況平居和易諧謔然嫉惡向義則勇奮不顧適曾氏姊貧捐資贖還其產業同僚張漢卿落職貧甚傾囊調焉鄉有漁民官責其逋課垂死爲之代償潘伯通等十人誣陷盜獄爲白其冤他如革橫刷之舟築捍澇之牖鄉人頌德輒自遜謝其行誼類此巡撫錢如京疏請起用而重已卒訃聞上遣官特賜諭祭

據粵大記
獻徵錄修

陳則字養新原籍四明元世有諱德甫者以進士官廣州提領始籍南海子季澤明洪武初舉人材赴闕授參議曾孫英字廷佐博記能文工詩賦甫遊郡庠卽隱屠授徒嘗建秋澗草堂于歸德門左郡人稱爲秋澗先生香山黃佐爲英高弟其父畿建粵洲草堂英與爲道義交時稱穗城二隱則則之

父也則稟性端方舉宏治十四年辛酉鄉薦授定州學正教士有方擢國子監學正轉博士正德八年癸酉典試福建遷北臺御史前後疏劾劉瑾江彬錢甯欺罔之罪朝端動色巡視東城執法不阿嬖寺歛跡出按保定繼巡湖廣所至舉賢懲奸釋冤摘滯除荊州重稅特糾內監抽分世宗繼統巨璫南迎宮眷多縱肆則密疏劾之詔扭璫解京楚民賴安復命掌河南道加光祿寺少卿致仕杜門講學閩粵士多歸之其學以心性爲宗梁儲與爲密友顏其堂曰心性著有心性學宗并疏稿詩集行世祀邑鄉賢孫世善字惟敬別號海槐孝友好義重于鄉閭世善子誠字表端諸生研心理學博貫六經世稱澹儒嘗語及門曰吾學靜以爲體觀以爲用體用雖殊靜觀無二建靜觀亭衣冠端坐其中因以爲號學使者魏

校薦擢方正甲申後猶耳目強健年百歲壽考合終云誠孫賓王領崇禎十五年壬午鄉薦

據金通志南海志修

鄺約字文博號古潭扶南伯和鄉人父瑄字樂富孝友好義鄉有爭者成就理質之邑令蔣昇旌為善士約宏治十四年辛酉鄉薦壬戌進士授龍泉令有廉聲改知金谿賑飢民不待請全活甚眾正德二年擢雲南道御史時畿內苦烙馬約以聞民免其害出按應天等府諸府沿江多水患堤決民輒失業約督治之始有甯宇劉瑾設店漁利奏革其扛解諸費屬守有藉勢求薦舉者約以曠職坐之時流賊猖獗守將無功約抗疏嚴劾聞者悚懾及考最稱能御史八年按貴州永甯羿蠻憑險構釁設民兵為久屯之計夷患少熄及程番土舍石承璽之亂約勒兵襲之獲其酋長俘千餘人都勻猛朔

以襲官爭擾或欲兵之約曰彼競以官非貳我也單騎入壘諭以順逆遂大屈服事聞有白金文綺之賜十年擢河南按察鎮守私人多不法約治之無怨言丙子入覲還治值巡撫李某招民開河眾懼不應約出郊一揮歸者如市以內艱歸尋卒子元陽貢生姪元禮元樂元祥彥舉元禮嘉靖二十四年乙巳恩貢官至重慶府通判年七十六卒元樂嘉靖十年辛卯舉人乙榜進士官至甯海州知州年八十卒元祥嘉靖二十五年丙午舉人官至承天府通判年七十一卒彥舉嘉靖十六年丁酉舉人官至國子監助教

據南海志修

方獻夫字叔賢福建金紫光祿大夫方宗元之裔來南海占籍焉祖權以強記博學名時人號曰方書櫃性狷介而喜周急里有訟者聞權風輒愧止年八十卒著有亭秋集十卷父

遂成化七年辛卯鄉薦爲全州學正卒子貴夫湖南永州經歷獻夫則遂遺腹產也生而育于祖弱冠舉宏治十八年進士改庶吉士乞歸養母旋丁母憂正德中授禮部主事調吏部進員外郎與主事王守仁論學悅之請爲弟子尋謝病歸讀書西樵山中者十年嘉靖改元夏還朝道聞大禮議未定草疏曰先王制禮本緣人情君子論事當究名實竊見近日禮官所議有未合乎人情未當乎名實者一則守禮經之言一則循宋儒之說也臣獨以爲不然按禮經喪服傳曰何如而可以爲人後支子可也又曰爲人後者孰後後大宗也大宗者尊之統也不可以絕故族人以支子後大宗也適子不得後大宗爲是禮者蓋謂有支子而後可以爲人後未有絕人之後以爲人後者也今興獻帝止生陛下一人別無支庶

乃使絕其後而後孝宗豈人情哉且爲人後者父嘗立之爲子子嘗事之爲父故卒而服其服今孝宗嘗有武宗矣未嘗以陛下爲子陛下于孝宗未嘗服三年之服是實未嘗後孝宗也而強稱之爲考豈名實哉是爲議者未見其合于禮經之言也又按程頤濮議謂英宗旣以仁宗爲父不當以濮王爲親此非宋儒之說不善實今日之事不同蓋仁宗嘗育英宗于宮中是實爲父子孝宗未嘗育陛下于宮中其不同者一孝宗有武宗爲子矣仁宗未嘗有子也其不同者二濮王別有子可以不絕興獻帝無別子也其不同者三豈得以濮王之事比今日之事哉爲是議者未見其善述宋儒之說也若謂孝宗不可無後故必欲陛下爲子此尤不達于大道者也惟孝宗之心所以必欲有後者在不絕祖宗之祀不失天

下社稷之重而已豈必拘拘于父子之稱而後爲有後哉孝宗有武宗武宗有陛下是不絕祖宗之祀不失天下社稷之重矣是實爲有後也且武宗君天下十有六年不忍孝宗之無後獨忍武宗之無後乎此尤不通之說也夫興獻帝當父也而不得父孝宗不當父也而強稱爲父武宗當繼也而不得繼是一舉而三失焉臣未見其可也且天下未嘗有無父之國也瞽瞍殺人舜竊父而逃今使陛下舍其父而有天下陛下何以爲心哉臣知陛下純孝之心縱不有天下決不忍不父其父也說者又謂興獻帝不當稱帝此尤不達于大道者也孟子曰孝子之至莫大乎尊親周公追王大王王季子思以爲達孝豈有子爲天子父不得稱帝者乎今日之事臣嘗爲之說曰陛下之繼二宗當繼統而不繼嗣興獻之異羣

廟在稱帝而不稱宗夫帝王之體與士庶不同繼統者天下之公三王之道也繼嗣者一人之私後世之事也興獻之得稱帝者以陛下爲天子也不得稱宗者以實未嘗在位也伏乞宣示朝臣復稱孝宗曰皇伯興獻帝曰皇考別立廟祀之夫然後合于人情當乎名實非唯得先王制禮之意抑亦遂陛下純孝之心矣疏具見廷臣方觚排異議懼不敢上爲桂萼所見與席書疏並表上之帝大喜立下廷議廷臣遂曰獻夫爲奸邪至不與往還獻夫乃杜門乞假旣不得請則進大禮上下二論其說益詳時已召張璠桂萼于南京至卽用爲翰林學士而用獻夫爲侍講學士攻者四起獻夫亦力辭帝卒用諸人議定大禮由是荷帝眷與璠萼埒四年冬進少詹事獻夫終不自安謝病歸六年召修明倫大典獻夫與霍韜

同里以議禮相親善又同赴召乃合疏言自古力主爲後之議者宋莫甚于司馬光漢莫甚於王莽主濮議者光爲首呂誨范純仁呂大防附之而光之說惑人最甚主哀帝議者莽爲首師丹甄邯劉歆附之而莽之說流毒最深宋儒祖述王莽之說以惑萬世誤後學臣等謹按漢書魏志宋史畧采王莽師丹甄邯之奏與其事始末及魏明帝之詔濮園之議論正以附其後乞付纂修官參互考訂俾天下臣子知爲後之議實起於莽宋儒之論實出於莽下洗羣疑上彰聖孝詔下其書於史館還朝未幾命署大理寺事與摠萼覆獻李福達獄萼等議馬錄重辟獻夫力爭得減死其年九月拜禮部右侍郎仍兼學士直經筵日講尋代萼爲吏部左侍郎復代爲禮部尙書明倫大典成加太子太保獻夫視摠萼性寬平遇事亦間有執持不盡與附會萼反陳沈獄請盡逮問官葉應

驄等以獻夫言多免逮思田州比歲亂獻夫請專任王守仁而罷鎮守中官鄭潤總兵官朱騏帝乃召潤騏還思田旣平守仁議築城建邑萼痛詆之獻夫歷陳其功狀築城得毋止摠萼與楊一清構獻夫因災異進和衷之說且請收召謫戍削籍余寬馬明衡輩而倍取進士之數帝優詔答之寬等卒不用獻夫以尼僧道姑傷風化請勒令改嫁帝從之又因霍韜言盡汰僧道無牒毀寺觀私創者帝欲殺陳后喪獻夫引禮固爭尋復代萼爲吏部尙書萼摠罷政詔吏部劾兩人私黨獻夫言陸粲等所劾百十人誣者不少昔攻摠萼者以爲黨而去之今附摠萼者又以爲黨而去之縉紳之禍何時已乃奏留黃綰等二十三人而黜儲良才等十二人良才者

初爲御史以考察黜上疏詆楊廷和指吏部侍郎孟春等爲奸黨萼因請復其職至是斥去時論快之安昌伯錢維圻卒庶兄維垣請嗣爵獻夫言外戚之封不當世及歷引漢唐宋事爲證帝善其言下廷議外戚遂永絕世封璫萼旣召還羽林指揮劉永昌劾都督桂勇語侵萼及兵部尙書李承勛又劾御史廖自顯自顯坐逮已又訐兵部郎中盧襄等獻夫請按治永昌毋令奸人以蜚語中善類帝不從獻夫遂求退帝亦不允給事中孫應奎劾獻夫私其親故大理少卿洗光太常卿彭澤帝不聽都給事中夏言亦劾獻夫壞選法徙張璫所惡浙江參政黃卿于陝西而用璫所愛黨以平代邪回之彭澤踰等躡遷太常及他所私昵皆有迹疑獻夫交通賄賂疏入帝令卿等還故官獻夫及璫疏辨因引退帝重違二人

意復令卿等如前擬頃之給事中薛甲言劉永昌以武夫劾冢宰張瀾以軍餘劾勛臣下凌上替不知所止願存廉遠堂高之義俾小人不得肆攻訐章下吏部獻夫等請從甲言敕都察院嚴禁吏民毋得講張亂政并飭兩京給事御史及天下撫按官論事先大體毋責小疵當是時帝方欲廣耳目周知百僚情僞得獻夫議不懌報罷于是給事中饒秀劾甲阿附自劉永昌後言官未聞議大臣獨夏言孫應奎趙漢議及璫獻夫耳漢已蒙詰譴言應奎所奏皆用人行政之失甲乃指爲毛舉細故而頌大臣不已貪縱如郭勛亦不欲人言必使大臣橫行羣臣緘口萬一有逆人厠其間奈何奏入帝心善其言下吏部再議甲具疏自明帝惡其不俟部奏命削二官出之外部謂甲已處分不復更議帝責令置對停獻夫俸

一月郎官倍之獻夫不自得兩疏引疾帝卽報允然猶虛位以俟十年秋有詔召還獻夫疏辭舉梁材汪鏐王廷相自代帝手詔褒答遣行人蔡燮趣之燮及門獻夫潛入西樵以疾辭旣而使命再至云將別用乃就道明年五月至京命以故官兼武英殿大學士入閣輔政初賜獻夫銀章曰忠誠直諒令有事密封奏聞獻夫歸上之朝至是復賜如故吏部尙書王瓊卒命獻夫掌之獻夫家居引禮自尊監司謁見輒稱疾不報家人姻黨橫于郡中鄉人屢訐告僉事龔大稔聽之獻夫還朝囑大稔會大稔坐事落職疑獻夫爲之遂上疏列其不法數事詞連霍韜獻夫疏辨帝方眷獻夫大稔遂被逮削籍十月彗見東井御史馮恩詆獻夫凶奸肆巧辨播弄威福將不利于國家故獻夫掌吏部而彗見帝怒下之獄獻夫亦

引疾乞休優詔不允獻夫飭恬退名連被劾中惡雖執大政氣厭厭不振獨帝欲殺張延齡常力爭而其時桂萼已前卒張璉最寵罷相者屢矣霍韜黃宗明言事一不當輒下之吏獻夫見帝恩威不測居職二歲三疏引疾帝優詔許之令乘傳子道里費家居十年卒先已加柱國少保乃贈太保諡文襄獻夫緣議禮驟貴與璉萼共事持論頗平恕故人不甚惡

之

據明史本傳
粵大記參修

張祐字天祐廣州人幼好學能文宏治中襲世職爲廣州右衛指揮使年十九從總督潘蕃征南海寇禡元祖先登有功正德二年擢署都指揮僉事守備德慶徭獞負險者聞其威信稍稍遁去總督林廷選引爲中軍事無大小咨焉守備惠潮擣盜魁劉文安李通寶穴平之選廣西右江參將分守柳

慶嘗發巡按御史朱志榮贓貪遂抵于法總督陳金討府江賊命祐進沈沙口大破之增俸一等擢副總兵鎮守廣西尋進署都督僉事古田諸猺獠亂祐言先年征討率倚兩江土兵賞不酬勞今調多失期乞定議優賚從之督都指揮沈希儀等討臨桂灌陽諸徭斬首五百餘級璽書獎勞又連破古田賊俘斬四千七百進署都督同知已復討平洛容肇慶平樂諸蠻增俸一等蔭子世百戶嘉靖改元遭母喪哀毀骨立以疾乞休還衛初上思州土目黃鏐作亂祐購其黨黃廷寶縛獻之總督張嶺惡祐不白已劾祐懷奸避難逮繫德慶獄數上書訟寃釋令閒住盧蘇王受亂田州總督姚鏐召至軍中待以賓禮多所裨贊後王守仁代鏐詢撫剿之宜祐曰以夷治夷可不煩兵而下守仁納之蘇受果效順因命祐部分

其衆事甯守仁言思田初定宜設一副總兵鎮之請卽以命祐報可破封川賊盤古子又剿廣東會甯劇賊邱區長等斬首一千二百勒銘大隆山十一年陽春賊趙林花陷高州總督陶諧檄祐討之深入多所斬獲忽中危疾卒軍中爲哀慟祐身長八尺智識絕人馭軍有節制與下同甘苦不營私產性好書每載以自隨軍暇卽延儒生講論嘗過烏蠻灘謁馬伏波祠太息曰歿不俎豆其間非夫也題詩而去後田州人立祠橫山祀之

據明史本傳修

梁廷振字伯綱少有孝童之稱正德二年丁卯領鄉薦庚午築海雲精舍于瀾石究心古學登嘉靖二年癸未進士連丁內外艱號慟屢絕服闋授兵部職方主事尋進郎中會安南弗庭廷議主討廷振力止之中外賴安十七年戊戌出爲廣

西副使同參政翁萬達督諸軍進剿斷藤峽號令嚴肅捷聞
賜金幣復平府江諸徭遷福建右參政督理糧儲公餘講學
閩士嚮風進按察使比入覲不持一物人服其節操遷浙江
右布政使尋轉左遇旱禱雨輒應時大工木商應給銀十八
萬兩衆商欲以數萬致謝廷振斥絕之未幾卒于任百姓嗟
悼同里有梁方者亦以成化八年壬辰進士歷雲南布政使
清介絕倫歷仕三十年所業僅餬口獨其秉憲時專尚威嚴
刑法過峻輿論以此少之今廷振子孫獨蕃盛云據南海志
浙江通志

粵大
記修

曾俊字仲才

南海志舊題名
錄皆云字元哲

其先保昌人宋咸淳遷南海九

江弱冠有文名

部使者才之中正德十四年己卯鄉試黃通
志選

舉及舊題名錄實正德丁卯鄉薦
粵大記與南海志傳誤作己卯

四上春官弗第謁銓授廣

西融縣融半徭獍梗化通賦訟必刻木投公府俊至誠撫之
衆皆樂輸邑多舞文詞其尤桀驚者罪之遂戢修翼宮與社
學暇則進諸生講解興至遨遊巖洞偕士人觴咏怡怡如也
制府檄征銅鼓山蠻他令苦當隘地請易之自當隘防禦惟
謹賊不敢越制府多俊功時皆難之邑之牛稅歲入千緡前
令多乾沒俊悉登于籍人勸爲子孫計則曰吾自有不盡之
福以遺之也竟以不能徇時免歸行李蕭然至今融人思之
嘉靖中博羅翟宗魯亦知融縣事廉與俊將語曰融令清白
前曾後翟俊既歸躬耕教子于理奧極深研精而諸子百家
亦靡不淹貫凡醫卜星緯律歷咸究其指所著有鶴峯集易
義一得洪範圖輯諸書藏于家其令融時有訓俗篇有關于
世教子應珪孫仕鑑相繼中式應珪字侯信幼神穎七歲日

誦三萬言祭酒倫以訓太守戴喟甚奇之錢塘田汝成視學得其文曰此力追秦漢者選舉茂異讀書越秀山嘉靖二十二年癸卯領鄉薦春闈屢黜絕意仕進居家窶甚乃授徒爲生篤於人倫事嫡母劉至孝木屐葛巾浮沈里中時托情于酒家貧不能沽有召輒往往輒醉徜徉泉石以終嘗夜出遇惡少行劫則佯醉衆扶歸過溪曰慎之慎之一入深淵不復出矣衆悟各散去隆慶壬申疾革正衾而卒仲子仕鑑字人倩生而四乳十歲解賦詩十五通經史嘗夢天人授彩筆半百書一函由是文思日進十九補邑諸生所著如兩粵鎮乘順德圖經翕然稱史才萬曆十三年乙酉舉于鄉壬辰授內閣中書時因倭警著兵畧上之經畧宋應昌得之驚喜疏請加仕鑑職銜充贊畫與東征帝以供事制敕不許甯夏平仕

鑑奉使諭兩廣復命纂修玉牒實訓實錄加俸二級錦衣千戶韋夢麒請采珠仕鑑疏止之又疏修屯政酌古適今鑿鑿可法遷戶部主事會差贛南直隸白糧乘便南還遂不復出天性孝友居喪三年不履房闕廬墓六載松降甘露家有嘉

瓜紫芝之祥云

據西樵遊志修

盧津字要卿號涯軒沙頭堡沙溪人性敏好學正德二年丁卯舉鄉薦辛未以乙榜授鳳陽府訓導學範師模嚴整弗苛父憂服闋改建平縣學嘗曰江北之士木質遲鈍吾緣飾以文江南藻發有斐吾勗以道母老乞終養歸起爲長興知縣竟不出家居孝友尤善教子子宁字忠獻別號冠巖博學工文而修正彊執能激昂任事嘉靖十九年庚子由順德學鄉薦二十三年甲辰登進士觀政通政司授崑山知縣嘉靖丁

未移知贛州興國縣事首發黠吏奸胥縣治肅清富民多食無稅之田積稅貧民竄虛賦無收使臣知宁才委之乃循畦履畝參稽審畫爬搜弓丈經界以正版籍無譌又數臨學宮集諸生講授文教聿興尤慎刑獄多所平反凡出死獄二十餘有胡文寵者非殺人而坐死罪羣官以其家富具獄莫敢言宁曰避嫌而殺人吾所不忍竟白其冤出之庚戌擢守潼川民懷其德祠于縣治之右甲寅遷南京戶部員外郎擢南京刑部郎中己未授山東登州知府辛酉卒于官舍所著盧子偶存蓋闢姚江之學云

據阮通志修

謹案阮通志云盧氏系出唐考功員外郎東美韓愈所謂相夔者其後自南雄州徙南海遂為南海人占居沙溪宁始由順德學廩生中式今順德志稱宁為

順德人南海籍者非是

霍韜字渭先舉正德九年會試第一謁歸成婚讀書西樵山世宗踐阼除職方主事楊廷和方柄政韜上言閣臣職參機務今止票擬而裁決歸近習輔臣失參贊之權近習起干政之漸自今章奏請召大臣面決施行講官臺諫班列左右眾議而公駁之宰相得取善之名內臣免招權之謗因言錦衣不當典刑獄東廠不當預朝議撫按兵備官不當以軍功授秩廕興府護衛軍不當盡取入京概授官職御史謝源伍希儒赴難有功不當罷黜平逆藩功自安慶南昌外不當濫敘帝嘉納之及大禮議起禮部尚書毛澄力持者孝宗韜私為大禮議駁之澄貽書相質難韜三上書極辨其非已知澄意不可回其年十月上疏曰按廷議謂陛下宜以孝宗為父與

獻王爲叔別擇崇仁王子爲獻王後考之古禮則不合質之
聖賢之道則不通揆之今日之事體則不順考儀禮喪服章
云斬衰爲所後者又曰爲人後者爲其父母報是于所後者
蓋無稱爲父母之說而於本生父母又無改稱伯叔父母之
云也漢儒不明其義謬爲邪說曰爲人後者爲之子果如其
言則漢宣帝當爲昭帝後矣然昭帝從祖也宣帝從孫也孫
將謂祖爲父可乎唐宣宗當爲武宗後矣然武宗姪也宣宗
叔也叔反謂姪爲父可乎吳諸樊兄弟四人以國相授受蓋
迭相爲後矣是兄弟自具高曾祖考也而可乎故曰考之古
禮則不合也天下者天下之天下非一人所得私也宋人之
告其君曰仁宗于宗室中特簡聖明授以大業陛下所以負
宸端冕富有四海子孫萬世相承皆先帝之德蓋謂仁宗以
天下授英宗宜舍本生父母而以仁宗爲父母也臣以聖賢
之道觀之孟子言舜爲天子瞽瞍殺人臯陶執之舜則竊負
而逃是父母重而天下輕矣若宋儒之說則天下重而父母
輕也故曰求之聖賢之道則不通也武宗嗣孝宗歷十有六
年孝宗非無嗣也今強欲陛下重爲孝宗之嗣何爲也哉夫
陛下爲孝宗子矣誰爲武宗子乎孝宗有兩嗣子矣武宗獨
無嗣子可乎臣子于君父一也旣不忍孝宗之無嗣獨忍武
宗之無嗣乎若曰武宗以兄固得享弟之祀則孝宗以伯獨
不得享姪之祀乎旣可越武宗且繼孝宗矣獨不可并越孝
宗直繼憲宗乎武宗無嗣無可如何矣孝宗有嗣復強繼其
嗣而絕與獻之嗣是于孝宗無所益而于與獻不大有損乎
故曰揆之今日之事體則不順也然臣下之爲此議也其故

有三日前代故事之拘也曰不忘孝宗之德也曰避迎合之嫌也今陛下既考孝宗矣尊與獻王以帝號矣則將如斯而已乎臣竊謂帝王之相繼也繼其統而已矣固不屑屑于天子之稱也惟繼其統則不惟孝宗之統不絕卽武宗之統亦不絕矣然則如之何而可乎惟陛下于興獻王得正父子之稱以不絕天性之恩于國母之迎得正天子之母之禮復于昭聖太后武宗皇后處之有其道事之盡其誠則于尊尊親親兩不悖矣帝得疏喜甚迫羣議不遽行而朝士咸指目韜爲邪說韜意不自得尋謝病歸嘉靖三年帝議尊崇所生益急兩詔召韜韜辭疾不赴馳疏言今日大禮之議兩端而已曰崇正統之大義也曰正天倫之大經也徒尊正統其弊至于利天下而棄父母徒重天倫其弊至于小加大而卑踰尊

故臣謂陛下宜稱孝宗曰皇伯考獻帝曰皇考此天倫之當辯者也尊崇之議則姑在所緩此大統之當崇者也乃廷議欲陛下上考孝宗又兼考獻帝此漢人兩統之失也本原旣差則愈議愈失臣之愚慮則願陛下預防未然之失毋重將來之悔而已始陛下尊昭聖皇太后爲母雖于禮未合然宮闈之內亦旣相安今一旦改稱大非人情所堪願陛下以臣等建議之情上啟皇太后必中心悅豫無疑貳之隙萬一未喻亦得歸罪臣等加賜誅斥然後委曲申請務得其歡心陛下朝夕所以承迎其意慰釋其憂者亦無所不用其極庶名分正而嫌隙消天下萬世無所非議此臣愚慮者一也昭聖之嫡嗣武宗一人而已矣武宗無嗣莊肅皇后之屬望已矣臣謂陛下之事昭聖禮秩雖極尊崇然其勢日輕陛下之事

聖母尊稱雖或未至然其勢日重故今日廷臣惓惓以尊大統母昭聖爲請者蓋預防陛下將來之失而追報孝宗之職分也臣嘗伏讀明詔正統大義不敢有違知陛下尊昭聖敬莊肅此心可上質天下信士庶矣但恐左右之人不達聖意妄生疑問或以彌文小節遂構兩宮之隙此不可不早慮而預防之也願陛下以臣等建議之情上啟聖母曰昭聖皇太后實大統嫡宗至尊無對伏願聖母時自謙抑示尊敬至意莊肅皇后母儀天下十六年聖母接見之儀不可輕忽凡正誕賀壽聖母每致謙讓不敢受納之意俾宮闈大權一歸昭聖而聖母若無與焉則天下萬世稱頌懿德與天無極萬一聖母意猶未喻亦得歸罪臣等加賜誅斥然後委曲申請務得允從庶宗統正而嫌隙消天下萬世無所非議此臣愚

慮者二也帝深嘉其忠義趣令趨朝明年擢少詹事兼侍講學士鞫固辭且請令六部長貳翰林給事御史俱調外任練政體監司守令政績卓異卽擢卿丞有文學者擢翰林舉貢人仕皆得擢翰林陞部院不宜因資格帝不允辭趣令赴職下其奏于有司悉格不用六年還朝命直經筵日講鞫自以南音力辭日講請撰古今政要及詩書直解以進帝褒許之其年九月遷詹事兼翰林學士鞫復固辭言自楊榮楊士奇楊溥以及李東陽楊廷和顓權植黨籠翰林爲屬官中書爲門吏故翰林遷擢不由吏部而中書至有進秩尙書者臣嘗建議謂翰林去留盡屬吏部庶不陰倚內閣爲腹心內閣亦不陰結翰林爲羽翼且欲京官補外以均勞逸議未卽行躬自蹈之而又躡居學士徐縉上何媿如之帝優詔不允明年

四月進禮部右侍郎韜力辭且舉康海王九思李夢陽魏校顏木王廷陳何塘自代帝不允再辭乃允之六月大禮成超拜禮部尙書掌詹事府事韜因言翰林院修書遷官曰講廕子及巡撫子弟廕武職之非而以爲已不能力挽不可隨衆趨且稱給事中陳洸寃薦監生陳雲章才可用帝優詔褒答不允辭韜復奏曰今異議者謂陛下特欲尊崇皇考遂以官爵餌其臣臣等二三臣苟圖官爵遂阿順陛下之意臣嘗自慨若得禮定決不受官俾天下萬世知議禮者非利官也苟疑議禮者爲利官則所議雖是彼猶以爲非何以塞天下口因固辭不拜帝猶不允三辭乃允之韜先後薦王守仁王瓊諸人帝皆納用嘗因災異陳時弊十餘事多議行張璁桂萼之罷政也韜謂言官陸粲等受楊一清指使兩疏力攻一清

奪其職而璁萼召還帝從夏言議將分祀天地建二郊韜極言其非帝不悅責韜罔上自恣言亦疏辯力詆韜韜素護前自遂見帝怒不敢辯乃遺言書痛詆之復錄其書送法司言怒疏陳其狀且劾韜無君七罪并以其書送呈帝大怒責韜謗訕君上醜正懷邪遂下都察院獄韜從獄中上書祈哀璁亦再申救帝皆不納南京御史鄧文憲言宜察韜心容其戇直天地分祀是置父母異處郊外親蠶是廢內外防閑帝怒謫之邊方韜繫獄踰月帝終念其議禮功令輸贖還職尋以母喪歸廣東僉事龔大稔訐韜及方獻夫居鄉不法事大稔反被逮削籍十二年韜起厯吏部左右侍郎時部事多主于尙書兩侍郎率不預韜爭于尙書汪鋐侍郎始獲參部事韜素剛愎屢與鋐爭鋐等亦嚴憚之旣而鋐罷帝久不置尙書

以韜掌部事閣臣李時傳旨用鴻臚卿王道中爲順天府丞韜言輔臣承天語無可疑然臣等猶當奏請用杜矯僞因守故事列道中及應天府丞郭登庸二人名上帝嘉其守法乃用登庸而改道中大理少卿久之出韜爲南京禮部尙書順天府尹劉淑相坐所親賊私被鞫疑禮部尙書夏言姻通判費完陷之訐言請屬事帝怒下淑相詔獄淑相與韜善言亦疑韜主之遂訐韜扈蹕謁陵遠遊銀山寺大不敬韜自訴因論言請諡故少師費宏爲文憲不敘宏累被劾狀按律增減緊關情節者斬且憲乃純皇帝廟號人臣安得用會南京給事中會鈞騎馬不避尙書劉龍潘珍轎龍與鈞互訐奏韜劾鈞且請禁小臣乘轎給事中李充濁曹邁等交章言近侍之臣不當避道雜舉公會宴次得與尙書同列以證語頗侵韜

韜疑充濁倚言爲內主訐充濁爲奸黨復摭言他事言益怒奏韜大罪十餘事且言彭時宋濂皆于正德間諡文憲不避廟號韜陋不知故事帝方不直韜淑相復從獄中摭言他事帝益怒考訊之辭服韜主使乃斥淑相爲民降韜俸一級當議乘轎時言被劾不預都御史王廷相會禮部侍郎黃宗明張璧請禁飭小臣如韜奏而南京諸給事御史自如韜以爲言帝復申飭衆情滋不悅曹邁及同官尹相等遂與韜忿爭相劾韜遷南部怨望擅取海子魚與鄉人羣飲郊壇松下侍郎袁宗儒期喪不當進表逼使行韜上疏自理下廷議帝爲停韜俸四月相等亦停二月韜旣與交惡及言柄用韜每欲因事陷之上言頃吏部選劉文光等爲給事中尋忽報罷人皆曰閣臣抑之給事中李鶴鳴考察謫官尋復故人皆曰賄

得宜諭吏部毋受當事頤指使天下知威福出朝廷而大臣有李林甫秦檜者不得播弄如左右其意爲言發也于是鶴鳴上疏自白並摭韜居鄉不法等事帝兩置之無何韜劾南京御史龔湜郭本湜等自辨亦劾韜帝並置不問十八年簡補宮僚命韜以太子少保禮部尙書協掌詹事府事疏辭加秩且詆大臣受祿不讓晉秩不辭或有狐鼠鑽結陰固寵權怨氣召災實有所自其意亦爲言發既屢擊言不勝最後見郭勛與言有隙乃陰比勛與共齟齬言時中外訛言帝復南幸韜因顯頌勛言六飛南狩時臣下多納賄不法文官惟袁宗儒武官惟郭勛不受饋今訛言復播宜有以禁戢之帝既下詔安羣情乃詰韜曰朕昨南巡卿不在行受賄事得自何人據實以奏韜對請問諸郭勛帝責其支詞務令指實韜窘

乃言扈從諸臣無不受饋遺折取夫隸直者第問之夏言令自述至各官取賄實蹟勛具悉始末當不欺如必欲臣言請假臣風憲職循途按之當備列以奏章下所司韜懼不當帝旨尋赴京列所遇進鮮船內臣貪橫狀帝亦不問明年十月卒于官年五十有四贈太子太保諡文敏韜學博才高量褊隘所至與人競帝頗心厭之故不大用先後多所建白亦頗涉國家大計且嘗薦大禮大獄得罪諸臣及廢籍李夢陽康海等在南都禁喪家宴飲絕婦女人寺觀罪娼戶市良人女毀淫祠建社學散僧尼表忠節旣去士民思之始與璫萇結旣而比郭勛舉進士出毛澄門下素執弟子禮議禮不合遂不復稱爲座主及總裁己丑會試亦遂不以唐順之等爲門生其議禮時詆司馬光後議薛瑄從祀至追論光不可祀孔

廟其不顧公論如此然為人質直好古行誼高潔平生得力在居處恭三字即獻納亦以此為第一義峽山有虎患韜文責山神俄而震雷殺虎峽江中有石壞舟過者必祭韜祝告于天即雷裂其石其感格甚奇二品敘廕舍子而官宗子與球積俸置產悉與從兄弟共之尤人所難云所著有詩經註解象山學辨程朱訓釋霍氏家訓渭厓集行于世學者稱渭厓先生弟任最知名另有傳長子與璞穎悟過人年十五註楚詞蚤卒與瑕與璵與瑤并舉于鄉而與瑕登進士

據明史本傳郝

通志

霍任字尹先韜之弟也少與兄韜讀書僧舍衣冠相對暑夜不改人服其端莊焉弱冠以諸生兩應舉不利輒謝去習靜西樵山中絕玩好斷戲謔與人一以真誠毫無矯飾與陳獻

章高弟鄧德昌輩泉石自娛嘗從王守仁湛若水遊窮究理奧所學曰遠事二親最孝居喪飭粥百日齋戒三年歲稔罄囊以賑多所存活語其子玠曰即此是推惻隱之心有被誣殺人者知其冤輒白當道釋之其人以百金為壽却之居西樵三十載比卒山中老少莫不惋惜所著心性說解宙山剩言行于世傑字民先任季弟也倜儻不凡脫然世外嘗遊羅浮不食十數日無飢色終身不娶有林逋風初欲近家園築室獨居諸兄止之傑遂屏去廝僕自負巨板入西樵獨棲錦巖中日出採蕨和粟炊之聞湛若水講心性之學移書辨論久之信服願執弟子禮方獻夫與論古今名賢無當意者獻夫笑曰真古之狂也嘉靖元年忽出省城登越王臺坐石而化所著論自成一家言韜稱其超然無累自得于萬物之外

廣少府志 卷一百一十一
謂世之奇士云邑有同姓名敦者字允厚聞若水講學西樵
來從之遊時大科書院方構敦首捐助而陳謨霍傑楊鸞協
成之敦居十年翹然齋長後若水官經筵嘗上書以輔養君
德興致太平爲言辭甚懇切生平重義好施家雖貧與門人
講學不輟卒於嘉靖己亥若水惜之

據粵大記郭通志
西樵遊覽志修

梁焯字日孚正德八年癸酉鄉薦九年甲戌進士與霍韜同
年韜重之登第後過韜與揭陽薛侃從王守仁學辨問居敬
窮理悚然有悟著傳習錄嶺南有王氏學自梁薛始拜禮部
主客主事十四年三月上議南巡與姜龍等十七人上疏諫
止上怒罰跪五日大杖三十車駕遂行會佛郎機夷人加必
丹末等三十員名入貢至南京江彬領四家兵馬從上遊豫
導引火者亞三謁上喜而留之比至京師入四夷館不行跪

禮焯執問杖之又番人寫亦虎仙與其甥米黑兒馬黑麻以
貢獻事誣陷甘肅文武大臣時彬及錢甯用事二夷人者或
馳馬于市或享大官之饌于刑部或從乘輿餽珍膳于會同
館或同僕臣卧起而大臣被誣者皆極楛幽囚以是輕侮朝
官焯每以法約束之二夷人相謂曰天顏可卽主事乃顧不
可卽耶彬聞之謂焯凌虐駕下人員將奏聞焯治後事以待
命三月丙寅武宗晏駕是日皇太后懿旨誅彬已而火者亞
三等就獄稱本華人爲外夷所役于是寫亦虎仙等皆伏誅
有詔佛朗機不許入貢以嘗弑其君也新政旌別淑慝焯嘗
諫被杖陞俸一級初舉人武陵冀元亨與焯同師守仁守仁
使元亨往甯藩察其逆狀比濠爲守仁所擒乃指元亨同謀
下詔獄死焯捐俸爲備棺斂嘉靖初改兵部職方司聞弟計

而病遂予告歸養宜興醫士周衝送之及別謂日益莫善于養心損莫甚于多慾焯佩服其言卒于家年四十有六卒後

霍韜經其墓必祭之據粵大記黃通志修

許士經正德八年癸酉舉人嘉靖間福甯州學正待士有恩禮輯楊時以來至朱熹門人語刻曰道南觀感錄又刻梭山

家訓士論翕然稱之據福建通志修

謹按南海志選舉云知縣與福建通志異

陸任忠字希旦正德十一年丙子舉于鄉歷知清流縣居官六載不以家隨人多其廉靜轉梧州府同知時議征安南理餉有功受金幣之賜佐梧八載以持正忤僚長輒棄官歸督府蔡經慰留弗聽積俸置產與二弟均之同里羅汝涇字湜卿亦以友愛稱嘉靖七年戊子鄉薦歷任知州忤權貴棄官

歸則蕭然父遺產數百金盡讓其弟自甘清約鄉評重之據郭通志修

李文充正德十一年丙子舉人知尤溪縣縣地曠險盜賊易

于嘯聚文充繕城郭嚴戍守聞警率兵直擣山陽雪山黃認

團諸若俘其渠率毀其巢穴民自是安堵據福建通志修

吳宗湯字允相少聰慧篤學德性溫醇正德十四年己卯南海

志誤作乙卯舉于鄉嘉靖十四年乙未中乙榜選橫州學正勤課

士貧者周之遷桐廬知縣清操自勵夙弊盡革蒞政三載吏

畏民懷及朝京師中途以病不克覲例當黜上官以其賢能

量移古田而宗湯飄然南歸不復出矣家食三十餘年足不

履城市里中楊希顏者被盜誣鍛鍊成獄後訴直指下郡覆

讞郡守以宗湯長者欲其一言而決希顏子奉厚資請宗湯

曰汝父本良民安用阿堵為竟白其誣而却其餽人皆義之
希顏感其德宗湯沒後諱曰必祭寒食醑墓終其身焉據郭通志

李紹敏字叔宜幼聰悟嘉靖初補弟子員督學歐陽鐸優異

之四人棘試弗售遂隱林泉天性孝友成童時侍父病衣不

解帶藥必先嘗事二母得其歡妹夫黃裳病異症同氣咸辟

去紹敏調護之數月又經紀其後事卒亦無恙兄子光寅黃通

志作嘉靖十九年庚子舉人為亳州學正子光宸字仲熙年

十一為郡諸生嘉靖二十八年己酉舉人庚戌連登進士授

戶部主事歷倉糧稅課草場監兌諸差發奸摘伏如老吏執

法不避豪貴都下目鐵面郎與同官李价互相砥礪擢漳州

知府值倭患振頽綱杜請謁嚴接濟修武備恤疲民釋冤獄

撫良善不期年而漳大治以議論峭直與當事者不合改官

台州條陳十事上之又豁派糴于富戶請汰冗兵力反舊政

居台三載以前隙罷歸前後部使者推轂于朝終不起其狷

操如此年八十一卒據南海志修

陳激衷字元誠號堯山行不疾趨容無遽色少為郡庠生釋

奠掌佾善歌鹿鳴諸詩聲出金石聞者樂之中嘉靖元年壬

午鄉試教諭邵武之建甯與諸生朔望習禮束修餽遺皆不

受晉國子助教棄官歸初何時矩師事陳獻章晚謂其學虛

無因喻王道要在農桑不徒虛言雷州多荒田可墾宜往開

耕以為民先著存羊錄由是激衷多借債往雷州開荒及至

耕熟為雷民所認將訟激衷棄還不校也而益貧困方獻夫

時延之談論及卒祀于鄉賢祠據黃通志修

陳澤字子仁號平川少穎異總角領嘉靖七年戊子鄉薦甲辰授浙江慶元知縣躬節省嚴保伍剔猾遂良民俗丕變有舉溪民積逋飢法澤諭之出受約束擇其子弟入社學延師訓之遂爲良民又諭撫粟洋礦徒葉姓千餘家俾立功贖罪衆誓以死甲辰冬礦賊吳八擁衆數千犯城澤亟撤橋阻水嚴捍禦賊乃掠聞去乙巳春潛諭葉姓率粟洋死士二百人追擊敗之獲渠魁十六人斬首三百餘級數十年劇寇一鼓殲之乃請以廢寺田價勑建縣城民賴保障尋膺薦剡課績爲浙令第一戊申內召士民攀轅樹碑以識去思拜南京貴州道御史振飭風紀按齊庶人獄得其平彈罷本兵大臣交通權貴者風采凜然巡視倉場革官攢侵漁與包攬冒支等弊壬子給由冒暑往返得病終于任澤天性孝友積官俸入

奉二親祖業悉讓諸弟爲政尙仁慈禁溺女革秤耗一日亟

戒慶民慎火已而燬者數百家又爲文禱除虎患其通于神

明與歿祀名宦所著有留臺存稿

據粵大記修

何維柏字喬仲號古林閉戶讀書玩繹周程諸子得其大旨嘗見同舍生臨祭而譁輒引避以爲辱已衆皆嚴憚之嘗慕西樵泉石負笈讀書其中時湛若水霍韜方獻夫亦山棲與語多默契嘉靖十年辛卯舉于鄉下第歸復入西樵古梅洞澄心靜坐日讀白沙集思見端倪嘉靖十四年乙未成進士選庶吉士授御史雷震謹身殿維柏言四海困竭所在流移而所司議加賦民不爲盜不止請罷沙河行宮金山功德寺工作及安南問罪之師帝頗嘉納尋引疾歸復入西樵與劉模王漸遠陳激衷爲莫逆交門人從遠方來者屢常滿久之

起巡按福建值歲大祲福與漳泉爲甚條救荒十餘策發倉廩餘羨親率郡邑長吏分行之民賴全活者數十萬二十四年乙巳五月疏劾大學士嚴嵩奸貪罪比之李林甫盧杞且言嵩進顧可學盛端明修合方藥邪媚要寵帝震怒遣官逮治士民遮道號哭維柏意氣自如賦孤臣尙有生還日聖德真同宇宙寬之句民間矢爲歌謠數十百章有誠徵錄以傳下詔獄廷杖僅存餘息備極拷掠語不變下獄與楊斛山周納谿劉晴川三人聚首甚愜上一日于宮中扶鸞判曰養身莫要于寡欲治國莫先于惜才上悟維柏乃削籍家居二十餘年教其弟維椅舉隆慶二年戊辰進士四方從遊日衆大會于廣孝寺發明白沙宗旨名其居爲天山草堂又闢河南勝地爲天山書院以處從遊之士隆慶改元召復官擢大理

少卿遷左僉都御史疏請日御便殿召執政大臣謀政事並擇大臣有才德者與講讀儒臣更番入直宮中燕居慎選謹厚內侍調護聖躬俾遊處有常幸御有節非隆冬盛寒毋輟朝講報聞進左副都御史母憂歸廬墓側萬厯初還朝厯吏部左右侍郎極論鬻官之害上修聖德勤聖學飭羣工諸疏多讜語忤大學士張居正意會御史劉臺亦劾居正居正乞罷維柏倡九卿留之及居正遭父喪詔吏部諭留尙書張瀚叩維柏維柏曰天經地義何可廢也瀚從之而止居正怒取旨罷瀚停維柏俸三月旋出爲南京禮部尙書考察自陳居正從中罷之年七十七卒訃聞上惻然賜祭諡端恪所著有易義禮經辨太極圖解天山草堂存稿及編陳子言行錄傳于世學者稱古林先生子崇亨以蔭厯南京都督府經歷

史本傳粵大記三水志修

洗桂奇字奕倩號少汾一號秋白幼聰警嘉靖十年辛卯弱冠舉于鄉登十四年乙未進士授工部主事時夏言權勢熾炙桂奇與語不合遂見忌吏部郎缺尙書霍韜擬補桂奇力辭求改南京刑部迎母就養尋疏請告時湛若水乞休南歸桂奇從舟行訪匡廬白鹿之勝復入閩探武夷九曲度嶺而歸卜築羅浮日與名公歌咏其間未幾兄卒母病桂奇乃疏乞終養築室古洛之濱屏跡城市逾年母卒哀毀骨立既而卒業若水之門講明心性之學巡按洪垣大參項喬每相過從鱸羹糲飯談必竟日總制張岳疏薦不起家居絕不干謁而建宗祠周姻族恤里之貧乏者則殫心力爲之癸丑歲大荒饑民嘯聚白晝行劫勢將叵測桂奇挺身出諭以利害衆

乃解散首捐粟以賑又勸諭二十四舖戶殷實人戶賑粟賑金所賴全活者數千而地方無恐鄉人立祠以報德星野盧夢陽爲紀其事載于忠義祠碑桂奇嘗奉母居羅浮草履素服無異野人世多其清風勁節寄處西樵與同門輯師說有問疑續錄據西樵山志阮通志修

劉模字叔憲號素子中嘉靖十年辛卯鄉試十四年乙未以乙榜授浙江蘭谿教諭大學士澱陽趙氏其受業門生也典試陝西得解元馬自強後致位尙書時稱其藻鑑擢知貴縣辭牛稅絕火耗清刷擄之弊弭五山之盜頌聲大作丁母憂歸起補四川梓潼革繁費以蘇里甲製灌車以興民利察何家殺婦之寃創何石亭忠節之祠吏畏而民懷焉致政歸父老攀留不得則肖像立祠于學宮之右復祀于名宦祠旣歸

甘貧茹淡而厚宗族和鄉里惓惓篤至與龐弼唐高何古林維柏諸人為詩易會所著如春王正月辯格致說學庸疑天德太極解多獨得之見其春王正月辯謂陽明言孔子作春秋以誅僭亂乃首改周之正朔何以服亂賊之心而杜魯宣鄭莊之口不知曰敬授曰巡狩皆用夏時則魯史所書固夏時耳何憂于宣莊小雅六官周公作也何嫌于改正朔耶其格致之說祖述程朱謂不學古而有博文一段工夫則夫子亦不必刪之述之矣皆至言也

據粵大記修

陳善字繼初號元山幼穎悟器宇凝重嘉靖十年辛卯領鄉薦乙未授全州學正誨人率先名節信義教學相長益嫻于文二十年辛丑成進士授刑部主事多所平反考績得賜恩晉員外郎擢浙江僉事時數十人採薪海島為邏者所獲誣

為盜巡撫欲按以大辟善力白釋之有盜錢糧者牽連人眾郡倖槩麗極刑善覈實出之其持公平類此陞廣西參政殫意經畧以平柳慶功擢江西清戎副使便道歸侍母遂不出時論重之既卒何維柏誌墓

據粵大記修

侯天錫字尚思別號退巖性孝執親喪哀毀踰節事叔南隱君如事其父與人交久而能敬樂易坦率不為町畦時推所積以周親友之寡者嘗曰陋巷一生顏氏樂清風千古伯夷貧蓋其素志也子國治字平裕嘉靖十三年甲午由三水學鄉薦授應天江浦令縣當南北衝驛役繁且疲綜理有方擢甯波府同知倭寇方張躬禦于舟山昌國之間捷奏賜金委署鄞縣慈谿定海餘姚所至有聲而城慈之功尤著晉南郡督府參軍事轉戶部郎中督密雲糧儲覈羨餘歸之公歲省

可三之一出守思恩所轄盡土司率以清正卻餽搗北三之
巢定武緣之屬尋陞廣西副使備兵蒼梧時大征八寨督撫
以國治監彝江軍國治先在思恩計賊情形甚熟遂以蠟書
約會諸將一鼓殲之奏功彝江為第一晉右參政遂引年乞

骸骨歸年九十卒

據南海志修

孫勳號次薇嘉靖十三年甲午舉人二十六年知口州事時
海上軍書狎至新命都御史治兵自浙入閩供帳不如意欲
庭撻州官勳顧謂行杖者曰撻我必重始快其忿不然汝死
杖下矣百姓感泣曰擁其輿以行初都御史至民且皇皇比

出境閭閻無毫髮擾者

據福建通志修

龐嵩字振卿居弼唐鄉學者稱弼唐先生五歲喪母痛顛哀
毀弱冠充郡庠生嘉靖十三年甲午舉于鄉講業羅浮山從

遊者雲集二十三年甲辰歷應天通判進治中先後凡八年
府缺尹屢攝其事始至值歲飢上官命督賑公粟竭貸之巨
室富家全活者六萬餘人乃蠲積逋緩征徭勤勞徠復業者
又十萬餘人留都民苦役重力為調劑凡優免戶及寄居客
戶詭稱官戶寄莊戶女戶神帛堂匠戶俾悉出以供役民大
蘇江甯縣葛仙永豐二鄉頻遭水患居民止存七戶嵩為治
隄築防得田三千六百畝立惠民莊四召貧民佃之流移盡
復屢剖冤獄有張元二者以追逃婦不及告嵩躬至婦所見
室畔縣崖矗立林木颯然心動行數十武而前佯執村老訶
問之對曰我但見屍遂得元二殺人狀又高淳傭人亡其妻
妻家以為死執之嵩偵知鄰有畫工以其妻歸日遯也計致
畫工奪還之聞者以為神戚畹王湧舉人趙君寵占良人妻

殺人置之法嵩饒吏幹百廢具舉尤加意造士暇則進諸生課之自捐俸以資賞給厯寒暑無倦早遊王守仁門淹通五經集諸生新泉書院相與講習發疑抉異無不虛往實歸者歲時單騎行縣以壺漿自隨所至肅然一蔬片楮不以煩民人目爲龐青天京府佐貳鮮舉其職至嵩以善政特聞府官在六年京察例而復與外察嵩謂非體疏請止之遂爲永制遷南京刑部員外郎進郎中撰原刑司刑祥刑明刑四篇曰刑曹志時議稱之遷雲南曲靖知府刻同文編以通三種夷字行鄉約保甲以變夷俗嘗董濬盤龍江及勘委夷情自會省至車里交趾之界轍迹徧厯不憚險遠居二載爲忌者所擠中察典以老罷而年僅五十旣歸茹淡服勤建祠祀先聯族以恩處鄉以睦復從湛若水遊聞隨處體認之說歎曰幾

虛此生後湛沒場居三年力恤其喪晚築室西樵大科峰下優游自適久之卒年七十七所著有太極解圖書解弼唐遺言皆爲學者傳誦應天曲靖皆祠之名宦葛仙鄉專祠祀之子一夔一德皆中鄉科一夔字仲虔舉嘉靖四十三年甲子鄉薦授蒼梧令下車裁浮冗修學造士聘禮名師尙書吳廷舉之裔寒微特請廩其孫于學宮涖邑六載撫流移墾荒田丁外艱去起補歸化令甫七月晉知養利州州由土改流民以村次更番供應一夔痛革陋規創舉條編糧差輕十之七定四禮簡易儀節刻諭俗編行之民知習禮向學六載遷永昌同知永昌向被緬患一夔建議築八關以扼險建二城以積儲練鄉勇省客兵爲握兵者所忌會緬入犯一夔周行部落分調糧米緬知有備遁去以禦緬功欽賞白銀千兩改除

九江府同知練兵江上懸賞校射清驛傳革私用夫馬使客武弁益嫉之一夔遂告休陞唐府長史不赴著有蒼梧養利志江門正脈諭俗編一德字與虔領萬曆四年丙子鄉薦從父講學于吳浙楚滇一時名儒器重之初諭恩平以二業合一訓士晉令嘉魚治崇大體去煩苛視事竟日無疾言遽色吏散堂空則搦管微吟邑饒山水每登臨從父老問民疾苦修諸葛武侯臺創吳清惠李大崖祠皆有關風教內監陳奉以督稅過六口地多流民武悍以石擊奉舟誤中其額奉盛怒民洶洶謀烏散一德謁之江潯從容理論不屈不竦奉怒解六口以安立祠祀之邑城崩一德請憲檄修築江上稱乞乞焉考滿膺薦嗣以頻年水災民飢不忍鞭撲仰天歎曰吾非不急公家賦如此菜色何遂上牘請改教職初授揚州再

授施州衛皆能興文起衰攝江都篆清介如一歸家著述耄年手不釋卷有雙瀑堂藁行世子璋乳源教諭孫嘉莖選貢

據阮通志修

吳旦字而待號蘭臯沙頭堡人父章正德十五年庚辰進士都察院左副都御史為官有風節且幼聰悟十歲能屬文舉嘉靖十六年丁酉舉人官歸州知州治行第一擢山西按察司僉事為諸生時師事黃佐與歐大任黎民表梁有譽為友結社南園世稱南園後五先生之一著有蘭臯集行世崇祀鄉賢又祀抗風軒朱彝尊謂旦詩格清新俊逸惜其稿失傳

耳據明詩綜修

盧夢陽字少明別號星野甫十歲通經書大義十四入郡庠嘉靖十六年丁酉鄉薦戊戌登進士請告畢姻庚子謁選授

刑部主事明允有聲陞員外郎兩拜恩綸封父母尋奉勅錄囚兩浙所釋活者若干人具恤刑錄中庚戌典試禮闈所得多名士丁內艱起補郎中轉憲副督學閩中會元田一儁榜眼黃鳳翔探花林士章皆夢陽所鑑識者乙卯遷遼東苑馬卿轉雲南參政辛卯鄉試入闈錄中文序多出手筆壬戌入覲遷福建右布政使賞萬壽表過里見邸報爲秦御史疏論罷職夢陽怡然少與同邑雙村馬拯齊名時稱盧馬馬舉丁酉解首同登甲第當時才名奕奕而馬不壽授工部主事而卒時論惜之夢陽雅好文詞貯書萬卷所著煥初堂文集藏于家

于家

據粵大記修

陳紹儒字師孔號洛南沙貝人父雁泉嘗夢神人授以積墨之法并甲榜二字以語府尹天游大異之是夕紹儒生異光

滿室識者占爲國器弱冠補從化弟子員應嘉靖十年辛卯歲貢卒業成均每試必居首司成湛若水呂柟咸器重之十六年丁酉與從兄紹文同中本省鄉試戊戌登進士觀政通政司給假歸省母病晝夜扶持不少懈還朝授戶部雲南司主事晉員外郎詰內豎混竊之奸革倉庫積年之弊議設陪庫主事經歷大使各一人以防闕出遂著爲令一年羨餘至盈五萬陞山東司郎中奉勅總理遼東糧儲兼理屯糧三年章凡十數上皆防守大計時承平日久忽報寇至登陴拒守寇不得逞而去益習騎射必破的諸將驚爲神授調山西雲南司進會計錄上優詔從之省京邊冗費二十餘萬陞湖廣按察司副使撫治鄖陽秋襄樊水溢城不沒者三版乃議築老龍諸隄以捍之又捐俸濟飢存活萬餘人襄人樹碑峴

山以紀其事居二年權貴文致其罪謫福建泉州府同知未
赴轉江西南昌知府越五月陞廣西按察司副使備兵右江
兼理分巡營新城堡又經畧千蔓理定等處置兵防守地方
安謐督狼兵救援兩浙所過秋毫無犯晉福建參政丁內憂
服闋補四川參政轉按察使平白蓮教秦政和之亂脅其渠
魁散其黨三千餘衆陞廣西右布政使尋轉左丁外艱起補
雲南左布政使召爲順天府尹釐革縣驛冒濫豪貴斂手甫
六月調太常寺卿上耕藉召問禮儀據經以對上韙之又奏
汰道流之冗濫者陞南京戶部右侍郎條陳遼東甘肅等十
三鎮兵馬主客錢糧言極明切上嘉納之轉左侍郎提督京
通臨徐等處倉場上議復漕運例限六疏晉南工部尙書有
忌者媒孽其短詔令致仕南歸杜門研究經典致老不懈其

窮理以濂洛爲宗文尙史漢詩祖少陵所著集二十卷行于

世卒年七十六詔給祭葬子宏采以蔭歷南戶部郎中鎮遠

知府宏乘歲薦國子典籍歷善化知縣孫熙韶熙昌熙陽曾

孫子壯

據粵大
記修

霍與瑕號勉齋

郭志云
字勉衷

韜仲子年十九領嘉靖十九年庚子

鄉薦三十八年己未舉進士授慈谿知縣時邑罹倭寇遐邇

蕭條與瑕恤孤賑寡寬里甲省詞訟均徭役慈民復甦然政

尙精明豪猾縮首與瀆安知縣海瑞齊名時稱二廉鄙懋卿

巡鹽淮浙所過州縣趨迎恐後惟與瑕暨海瑞不往謁懋卿

銜之嗾御史袁瀆劾罷歸赴西樵者六年隆慶戊辰用給事

中張鹵等薦起知鄞縣遷南太僕丞轉兵部員外郎終廣西

僉事時飭兵江左酋黃金彪叛督撫議進討與瑕以計縛致

又撫八寨城新甯州俱有功會曼去御史唐鍊劾調簡兵部
尚書譚綸重其才為除江西饑憲踰年復為御史張簡所劾
與瑕歎曰吾安能隨時俯仰視人眉睫乎遂拂衣歸二十餘
年卒所著有勉齋集慈谿新甯并祀名宦孫蒙拯萬曆四十
三年乙卯舉人壽州知州拯子師乾崇正六年癸酉舉人學
濟歲貢乾子文寅康熙八年己酉舉人據南海志修

孫裔興字奉初號居素家世武弁裔興始以經術顯嘉靖十
九年庚子舉于鄉筮仕崇明洞悉隱微審編清丈皆有法又
浚水利溉旱田千餘頃三載績最召為陝西道御史鯁直敢
言疏救同僚詹仰庇廷杖劾司禮太監孟冲弄權皆撻逆鱗
幾不免輔臣趙貞吉與首輔高拱不協罷政在位者莫敢送
裔興獨郊餞之以此忤拱出為福州屯田僉事田多侵于豪

貴裔興按籍清隱占務足軍需攝督學選貢力拒請託時年
甫強仕已厭榮進子蕙以隆慶四年庚午舉於鄉遂請告家
居六載恬淡自如屢膺薦剡竟不起卒年六十二蕙後仕至
廣西通判裔興仲弟振興嘉靖二十八年己酉鄉薦令長樂
練達有為季弟嗣興選貢任南安廉靖不苟蕙之弟萱庠生
蕙之子光祚萬曆四十年乙卯鄉薦仕至布政據南海志修

李光宸字仲熙嘉靖二十九年庚戌進士授戶部主事年僅
二十四遍歷倉糧稅課草場監兌諸差發奸摘伏如老吏執
法不避豪貴世人目為鐵面即與同官李价立互相砥礪俸
入外絲毫不以自沾擢漳州知府歲荒盜熾復丁倭患光宸
振頹綱杜請謁嚴接濟修武備恤疲民釋冤獄撫良善朞月
而漳大治倭寇已息與當事不合改官台州益自奮厲以禦

彝安民為已任條陳十事上之居台三載以前隙罷歸年八十一卒據張府志修以上南海

南海李徵爵分纂 南海梁起初校 番禺金佑基再校

廣州府志卷一百十六終 番禺史悠泰三校 順德羅槩四校

廣州府志卷一百十七

列傳六 明 南海

龐尙鵬 弟尙鴻

戴朝恩

楊佐 子瑞雲

陳萬言

劉介齡

陳堂 父其魯

金詔 子節 簡

姚文寬 弟文粹 子光虞 光

朱讓

李楚

霍蓋臣

張守讓

霍鎮東 子見大 姪應陽

王學會

盧龍雲

羅紳

霍騰蛟

彭哲興

馮奕垣

關驥

曾道唯

郭尙賓

潘濬

吳光龍

李待問

兄孝問 敬問 弟應問 陞問

梁士濟

龐景忠

陳熙昌

區慶雲

父次顏

陳熙韶

唐夢鯤

關季益

謝雲虬

關捷先

鄺曰廣

關鍾喜

劉聯騶

林清

陳鶴

楊邦翰

黎堯賓

陳全學

霍子衡

陳子壯

朱實蓮

劉士斗

羅之玉

鄧務忠

馮光璧

楊景燿

高為礪

楊可觀

霍師連

霍達芳

羽鳳麒

鄺露

子鴻

明

龐尙鵬字少南南海人幼慷慨有大志弱冠入邑庠輒居首
中嘉靖二十五年丙午鄉試三十二年癸丑進士觀政兵部
與尙書聶公豹講心性之學擢監察御史偕給事中羅嘉賓
出覈南京浙江軍餉請罪參將戚繼光張四維得總制胡宗
憲失律貪淫及監軍鄒懋卿侵軍需狀與巡撫王本固同發

其事語侵嚴嵩執政怒幾中奇禍賴上不問還朝又執奏如前一時直聲震海內上防倭五事及通變民宜疏時論臆之出按河南強宗撓法首鋤其最跋扈者所至貪墨吏望風解綬巡撫蔡汝楠欲會疏進白鹿尙鵬不可故其詩有云曾訝舟山多白鹿俄聞雙兔出淮陽及九重若問豐年瑞願上流民鄭俠圖之句事遂寢尋丁外艱服闋催赴河南道管理考察事力爲善類有才望者存留時科臣胡應嘉疏劾郭安陽不法與高拱相倚爲奸得罪疏球甚力且劾輔臣不報改按浙江首按墨吏稱眞御史上里甲均平疏民苦徭役爲舉行一條鞭法巡撫劉畿討平礦寇屬尙鵬紀驗釋出幼小者千餘人按治鄉官呂希周嚴杰茅坤潘仲驂子弟僮奴請奪希周等冠帶詔盡黜爲民已督畿輔學政立學規務先德行重

經術次文藝士習丕變穆宗卽位會言臣首陳時政又上宏獻納以光聖治慎服御以重郊禋廣恤典以勸忠義等疏隆慶元年請帝時御便殿延見大臣恤建言得罪者馬從謙等已又申救給事中胡應嘉論大學士郭樸無相臣體還京侍經筵預修肅皇實錄擢大理右寺丞明年春朝議興九邊屯鹽擢尙鵬右僉都御史與副都御史鄒應龍唐繼祿分理尙鵬轄兩淮長蘆山東三運司兼理畿輔河南山東江北遼東屯務抵昌平劾內侍張恩擅殺人兩淮巡鹽孫以仁贓罪皆獲譴其秋應龍等召還命尙鵬兼理九邊屯務疏列鹽政二十事鹺利大興乃自江北躬歷九邊先後列上屯政便宜江北者四薊鎮者九遼東宣大者各十一甯夏者四甘肅者七奏輒報可尙鵬負經濟才慷慨任事諸御史督鹽政者以事

權見奪欲攻去之尙鵬巡歷邊疆足跡殆徧經畧籌畫必求久安與總督王崇古河套搗剿功大奇執政忌之遂不得敘河東巡鹽部永春劾尙鵬行事乖違吏部尙書楊博議留之少輔高拱不悅會中官惡博激帝怒罷博而落尙鵬職九卿科道會疏留之不報遂汰屯鹽都御史官時三年十二月也明年復坐按浙時驗進宮幣不中程斥爲民神宗立御史計坤亨等交薦保定巡撫宋纁亦白其無罪萬曆四年冬始以故官撫福建奏蠲逋餉銀五十餘萬推行一條鞭法劾罷總兵官胡守仁屬吏咸奉職張居正奪情重譴言者尙鵬移書救居正深銜之踰年會拜左副都御史居正令吏科陳三謨以給由歲月有誤劾之遂罷之回籍聽用抵家二日丁母艱家居四年卒年五十有八遣官諭祭閩人爲之罷市與殷從

儉並祀西湖上歲時伏臘尙呼爲龐公福云浙江福建暨其鄉廣東皆以徭輕故德尙鵬立祠祀所著有百可亭稿十六卷奏議十卷其殷鑒錄行邊漫紀仲弟尙鴻彙次爲評斷疏進之天啟中賜諡惠敏尙鴻字少襄遇事剛決饒經濟才由廣甯學超貢入都上書政府名動京師復上安邊飛車飛舟殷鑒錄諸疏悉得旨下部授鹽城司訓立學規式多士皆先正格言尋擢英山令首詳九弊十害行之是時河決爲陵寢患撰治河三策河道移文令輟縣事協理河運巡撫與巡河議不合移怒謫西安諭轉上海尉復奉濬吳松江遷崑山丞疏論輔臣溺職留中不報遂掛冠歸兩修南番邑乘據阮通志修戴朝恩字東江嘉靖二十五年丙午鄉薦令尤溪初至官會山寇竊發朝恩嚴防守增城堞練士卒鍛戈矛凡火炬藥箭

銃礮之類無不畢備次年秋叛兵連結山賊七千突至攻城朝恩召鄉兵獵戶分布四門自督防守三十餘日寇潰圍去

以母喪解官歸

據福建通志修

楊佐字相夫號少懷弱冠為博士弟子員檢身績學為歐陽石岡諸公所重九試場屋不合嘉靖三十七年己酉貢南宮業於太學值北有警以司業趙兼僉都御史講武事佐入侍經幄出參戎幕趙司業亟稱之待選於家從湛若水講心性之學戊午謁選為思恩府經歷時有土目韋帥者弒其主攝府事黨同知畏不敢問以印付佐佐慨然任之集該司舊日出故巡檢幼子以大義感動之眾皆掩泣請効力乃帥眾逐韋帥帥走田州死焉按臺陳我渡檄褒之使攝上思州及宣化縣事以薦陞興安知縣停逋負之征正豪強武斷之罪吏

畏而民懷之陞岷府審理至任踰月卒李義壯誌其墓稱其廉足勵俗惠足濟眾勇足禦武智足解紛而正足格物為應世之具云子瑞雲登萬曆二年甲戌科進士居官所至有聲

據粵大記修

陳萬言字道襄別號海山自幼岐嶷年十一以奇童為邑庠弟子垂二十年領嘉靖三十一年壬子鄉薦三十五年丙辰成進士授池州府推官鋤奸剔蠹池民頌之滿三年召拜御史巡中城時同年御史鄒應龍劾首相于世蕃眾懼不測萬言往訊之相與鼓琴終日已巡長蘆清釐積弊巡閩中倭寇警急行視列郡嚴檄戚繼光為防禦計民賴以安再巡川蜀邊羌入貢溢常例者三百餘人以朝廷威德諭之俾遵舊約風紀丕振其巡閩蜀也皆典試事得名士最多遷江西副使

視學二載聞母病卽疏辭歸母卒服闋以御史疏薦補大名兵備副使改永平轉江西右參政為忌者攜撫乃致政歸結社浮邱優游林泉者十餘年而卒生平慷慨大度不為小廉曲謹卒年七十有五子鳴陽鳴岳鳴燕皆庠生

據粵大記修

劉介齡字少修別號鶴臺其先金陵人始祖雲甫生壽庵元末仕為廣州路教授卜宅州城遂為南海人高祖鉞以來歷世隱德至父穗波甘貧矢誨介齡十歲從師稍長為諸生中嘉靖三十四年乙卯鄉試三十八年己未成進士授長興令邑多豪強不少假借訟日省而逋負早完直指才之檄兼理諸郡縣所至風裁凜然而謗者亦眾內召遷大理評事再調望江知縣值母喪歸謗益叢起出為蘄州判官轉承天署部事庭無留獄時獄多疫則為代備贖緩出百餘人擢福甯州

地瀕海多寇倭眾來薄州城乃開門盡入外郭之民徐堅壁拒戰賊潛遁去又捐俸營寨堡民恃有備陞蘇州郡丞蘇大郡也織造之費歲數十萬諸當事者索例繁多介齡一切汰之眾皆側目與守相忤調台州歲餘以前憾遷荊州府長史乃歸卜池亭於浮邱之右灌園賦詩浩然自得所為詩文自成一家誠令勿梓今散見於浮邱社集颯颯可誦也子孔集

端復曾省孟淑皆能繼其志者

據粵大記修

陳堂字明佐父其魯字思穎

增城志云其魯增城西洲人子堂補南海學生遂僑居南海

性孝事父惟謹弱冠補弟子員與洪垣同受學於湛若水杜門菡圃者二十餘年萬曆八年庚辰夏卒堂生而聰警其魯授以經書嘉靖三十四年乙卯鄉薦隆慶二年戊辰登進士筮仕嚴州推官以治行最徵拜南京湖廣道御史屢奉勅巡

視所至激濁揚清釐奸剔蠹萬厯五年丁丑閏八月日食不見九月彗星見從東南方起長亘天堂上疏論河套貢市漕河段正諸宜興革狀及請斥權璫退不法司馬乞宥諫臣纒纒萬言皆切時弊會元輔張居正奪情欲堂附會保留堂不可復劾大臣之黨庇者益與張忤遂出爲四川參議以大計貶官時父其魯病且革堂歸旬有二日乃屬纊遂居家奉母九膺薦剡不應母終起授廣西僉事大征岑溪奏捷堂有勞焉踰年入賀晉光祿少卿疏裁冗費又請皇太子冠婚危言勁氣不減居南臺時未幾奉使冊封以南京尙寶司卿致仕堂嫺詞翰致仕後益肆力著述與王唯吾覽勝探奇家居二十年卒往來西樵與霍尙守善嘗築別墅於浮邱之麓名朱明館易簣前厯羅浮諸峯賦詩數章歸後事葬期手自裁定

談笑而卒所著朱明洞稿湘南皇華南歸諸集邊河四疏行

於世據羅浮山志會編修

金詔字廷言其先廬陵人從叔貴以水軍千戶調衛廣州占籍南海詔少聰敏精楷法初業儒後以武胄補幕府參隨張兵總制二廣大征田州及黎賊兩遣調兵於思恩忠州盡卻常例督兵所過秋毫無犯制府奇之年七十八往觀金陵形勝鶴髮飄蕭都人士以爲仙僉問長生訣詔曰修短本造物得來清心寡欲似亦有助借居倪文毅花園密書其別室曰謹言語防物議其自持若此以子節貴封戶部員外郎年八十卒次子簡庠生有文名節字持甫隆慶四年庚午魁鄉薦萬厯五年丁丑成進士官中書秩滿改南京戶部員外晉郎中出守臨安與同知李鞞督剿巨寇普應春等捷聞賜金幣

擢憲副備兵金騰緬賊阿瓦犯邊親歷三司布揚威令賊平以憂去起補閩臬分部漳南時倭氛孔亟節調度兵食保障山海以河稅充餉中使不能奪翦制豪猾訟息民安民感其德立祠祀之未幾以廣西參政罷還卒於家著有缶鳴集吳粵草仕學膚言行於世

據南海志修

姚文寬字裕夫別號東臯蟠岡人父經有隱德文寬天性孝友執父喪哀毀特甚與弟文貫文粹文暢同居合爨斗粟尺帛不以自私諸弟或為好訟者所齟齬必力為直之嘗次烏灘遇蠻兵舟人皆懼亡慝文寬挺身理論眾驚歎解去弟文粹字純夫號蟠山師事黃佐嘗疏鍾律萬餘言佐嘉與之為詩俊逸不規規字句為工蓄古圖籍甚富分授諸子姪時為講說兄子光虞光南光泮相繼擢科第文粹誨誘為多嘉靖

己酉將踰嶺游豫章疾作而返卒無子以光泮為嗣光虞字繼如少從黃佐講學潛心稽古嘉靖三十四年乙卯舉人授宜山學官陞南京翰林院孔目七年遷都察院都事尋轉經歷秩滿擢守慶遠教民開墾耕種以益國課廣設鄉校冀變蠻俗土司餽遺皆卻之萬曆壬辰覲還卒於徐州四世同居百口無間人尤敬之生平好詞賦著有玉亭薊門西遊諸稿藏於家光泮字繼昭嘉靖四十年辛酉鄉薦四十四年乙丑進士授行人擢南京山西道御史進議謁孝陵儀式帝嘉納之巨商韓嘉言為權貴誣以窩盜輦金數萬賄當路光泮特疏糾之奉嚴旨勘問諸大吏受賄得實悉罷斥以是中忌出為泉州守泉稱難治甫下車即廉得一二巨奸繩以法豪猾斂戢均賦役寬逋負建文廟郵孤寒懲吏胥民畏而愛之武

弁於惠安海上獲徒黨百餘人實漳泉商賈也當事欲文致以盜為功賞地光泮知其冤曰奈何以人命為利媒乎當事領之未幾報罷解組歸闕郭西荒畦構堂榭結社賦詩相國史繼偕顏曰亦自丹邱據南海志修

朱讓字次夔嘉靖三十七年戊午鄉舉萬曆二年甲戌進士初授福建南平令溪水暴至民居多壞讓開倉賑濟始獲安堵調江西臨川令循聲益著兩分考江西得士皆成進士作令六載擢南京戶部主事差權浙江北新關晉員外郎丁亥擢四川夔州知府時歲大旱讓精誠露禱即大雨州縣利病盡為興革節省繁費倉儲充實夔乃大治入覲還至公安以病乞休讓嘗夢蠶滿篋間後歷任蜀中蓋古蠶叢國也旋投符歸撫按屢薦讓未嘗以一刺私謁優游林下捐修橋梁以

便行路壽七十卒祀鄉賢孫實蓮經魁知縣伯蓮舉人實蓮別傳據南海志修

李楚字卓倩嘉靖四十年辛酉鄉薦湖廣零陵教諭遷江西安義尹邑新被盜城破民殘祿餉無所措當事督責而楚專務和議格不入改廣西平樂教官居六載擢四川重慶府判出鎮黃平職權糧馬黔與湖北三省倚以濟事楚以公廉威信行之播酋楊應龍與奢氏爭強楚承檄往勘龍餽全鹿藏鏹四十楚不受應龍又與冉維屏交構奏勘十餘年不決龍欲冉赴烏江河設伏邀殺之楚徙其勘地謀竟不行而應龍亦不即逞者以楚在也後遷衡府長史遂拂衣歸據南海志修
霍蓋臣字子宣隆慶四年庚午舉人授貴陽司理土司安國亨據險桀驁蓋臣至則為開陳順逆曉以禍福國亨受約束

擢荊州同知改梧州稍遷浙江憂去復除前任時稅璫欲增
餼餉蓋臣言於御史委曲調劑鹹政為之一清晉岳州知府
築堤捍水禁戢盜賊居人行旅安焉罷官卒於家

據張府志修

張守讓字懋功少穎異弱冠與兄守謙隆慶四年庚午同舉
於鄉選福建永安令革陋規創書院復建雁塔橋施藥局前
令有兇犯林正興手刃二人而逃五載不獲讓方視事忽有
異葉墜庭蟲蝕成文似書十九日夢溪獲數字讓袖而識之
發健卒往夢溪果獲以歸磔於市閩邑稱神邑有虎患為文
禱之詰旦虎避去出勸農中途羣鴉繞輿鳴讓疑其寃遣人
跡之得遺骸山側密訪其行兇者一訊立服秩滿擢大理評
事厯寺正平反甚眾出守鎮遠治無城郭居民輻輳歲多回
祿讓涖任未幾一夜火大作延及衙署讓引罪自責俄而風

返火滅由是設救火法改築火神廟患遂絕有兩巫同往鄉
落其一被殺讓設法緝同行之巫庭鞠時有異蛇懸伏其首
若聽讞狀讓發其奸蛇為點頭又念郡俯大江民多病涉捐
俸造橋以利水道晉本省思仁副使以憂去服闋補貴州貴
甯道時苗患孔棘兩臺會題征剿監軍以疾告當道謀其代
者讓毅然請行條陳七款深得要領因榜示禍福諸苗爭來
降撫剿並行竟以勞瘁不起天啟三年撫按上其功有材長
戡亂志篤捐軀之語蓋實錄也奉旨酌卹讓性至孝母諱日
掩面沾襟居官實心實政鎮遠永安俱祀名宦

據貴州通志金通志修

霍鎮東字彥蕃六歲失恃事繼母以孝聞舉隆慶四年庚午
鄉薦第一五年辛未成進士授刑部主事清慎勤勞大司寇
嚴清慎人性廉介少許可獨器鎮東辛巳當恤刑首以鎮東

往浙事竣擢雲南副使備兵曲靖皆清薦也鎮東在浙時平反囚獄四百餘人泣曲靖恩威並著緬寇孔亟撫滇者欲調尋甸兵鎮東言尋方新附調之恐生他變力持不可未幾以父喪罷服除補湖廣副使分部岳州江防有行客被殺漂尸至君山寺鞠獄者槩坐無辜鎮東廉得其寃具狀白撫臺李某冀得釋而李已主先入與鎮東忤度不可解遂題詩岳陽樓棄官歸後李覺悟與藩臬遣使追留則已飄然度關矣屏跡林泉年七十二卒子見大萬歷十三年乙酉汝元萬歷二十二年甲午皆舉於鄉姪應陽爲邑庠生慷慨好義以理學教迪生徒所得館穀嘗周急救喪傾囊相助創建文昌閣於大岸至今存焉

據金通志修

王學會字唯吾萬曆四年丙子賢書五年丁丑進士授醴陵

知縣俗豪橫飭法以三尺繩之境內肅清調崇陽均土田平徭役隆學校縣稱大治擢南京御史時吏民有罪輒遣官校逮捕學會疏請止之不納疏救言官孟一脉等糾劾不避權貴十三年慈甯宮成督工內侍俱廢錦衣學會論其太濫且劾工部尚書楊兆諛諂中官兆惶恐引罪已言龍江關密邇蕪湖蕪湖已徵稅龍江不宜復徵格不行光山牛產一犢若麟有司欲以聞巡撫臧惟一不可帝命禮部徵之尚書沈理諫惟一亦疏論不聽學會抗言麟生牛腹次日卽斃則祥者已不祥矣不祥之物所司未嘗上聞陛下何以聞之毋亦左右小人以奇怪惑聖心也今四方災旱老稚流離啼饑號寒之聲陛下不聞宗室貧窮饕餮弗給愁困涕洟之態陛下不聞而獨已斃之麟聞彼爲左右者豈誠忠於陛下乎願收還

成命內臣語涉邪妄者即嚴斥之帝責其要名沾直降興國判官時御史蔡時鼎亦以言獲罪南京御史王藩臣給事中王嗣美等交章救兩人帝怒奪俸一級學會累遷南京刑部主事召為光祿丞與少卿涂杰合疏爭三王並封忤旨皆削籍後數年吏部尚書蔡國珍疏請起用不納學會歸闕飛雲洞奉母二十載偕御史區大倫輩倡明道學撫臬聘修省乘及南番兩邑乘推銀臺參議不報旋卒於家學會汎愛置嘗田設義塚邑中凡大議大事靡不力請當事助成之如建海鰲寺塔浚復太平濠尤為闔省之利祀鄉賢泰昌紀元卹錄先朝舊臣降詔褒嘉贈太僕寺少卿賜祭一壇所著有入楚吟疏草壬癸存草山中約言西遊草五羊約法飛雲等集

海志修

據南

盧龍雲字少從沙頭堡人生有異徵幼穎悟萬曆四年丙子舉於鄉十一年癸未成進士授馬平知縣清兼併汰浮冗田賦獲免二千餘石補邯鄲令復補長樂邑苦洪潦龍雲創濬陳唐港圳抵海三千餘丈疏導濱湖巖湖七十二洋總流不能俯仰權要左遷江右藩幕貴竹直指馮聞其才名聘往分考名士多出其門尋轉南大理寺副晉戶部員外郎出權揚州陞貴州參議

貴州通志云分守新鎮

時苗眾猖獗下車即訪苗情條

其竅要於中丞恩威並用苗遂懾服往來嶮峒力瘁成病遂不起中丞疏其功奉旨有白金文綺之賜下部議卹所著有四留堂稿三十卷尚論全篇百餘卷易經補義談詩類要諸書行於世

據南海志修

羅紳字象文萬曆七年己卯舉人授乳源教諭晉應城令置

學田崇節義政教兼修轉永安州會昭平賊首韋扶仲率黨
人寇紳擒斬渠魁五十餘名招撫八百餘家活男女二千五
百口升建甯同知攝府篆興利除害清勤益著推撫州知府
以母老終養著大受堂稿子士阜恩貢孫璟璋俱恩薦曾孫
顯康熙甲子科首貢文行尤著

據張府志修

霍騰蛟萬曆十六年戊子舉人知壽甯署建安甌甯建陽三
縣所至有聲順昌妖人吳建鼓眾謀亂撫檄延建二府往撫
眾相顧失色騰蛟獨請行單騎入壘諭以禍福賊中有欲加
害者建曰可殺我毋殺仁父母也護之還既而賊相誅戮官
軍乘勢殲之屍蔽山谷騰蛟嘆曰皆吾赤子令聽吾言何遽
至此捐資買山瘞之

據福建通志修

謹案南海志選舉表云歷官同知

彭哲與字倩明萬曆十七年己丑進士任長樂縣殫心竭力
羣廢畢舉歲荒單騎遍歷鄉閭勸民出穀交賑存活萬餘人
擢南京戶部主事督理鳳陽漕儲革弊除奸轉員外郎郎中
遷楚黃郡守調梧州遷雲南澂江道移鎮臨安會小醜之警
哲興調兵轉餉積勞成疾卒於官祀名宦

據張府志修

馮奕垣字弱璧萬曆十九年辛卯舉於鄉二十九年辛丑成
進士選庶吉士改御史巡視西城時逆璫飭法按治不避權
豪斂戢丙午巡按貴州黔以平播後苗民土司占印爭官加
以蜀撫貪功大擾邊徼奕垣特疏參處詔追印寢兵黔蜀百
萬生靈不至糜爛者奕垣力也按部抵銅仁四面俱紅苗窟
穴向無城垣捐緡城之以積勞瓜代還家遭病卒敘功加贈
光祿寺少卿生平儉樸不貴異物征苗獲銅鼓二銘刻製自

姚虞卻而不納由史館以迄西臺朝廷利弊知無不言所上
有二弊五窮疏挽亂圖治疏信任輔臣疏請平銓政疏皆宗

社碩畫云祀名宦鄉賢

據金通志修

關驥字德甫萬曆二十二年甲午鄉薦三十二年甲辰進士
初授全椒令講荒政出俸賑飢身行阡陌教民濬陂蓄洩尤
加意學校置田以贍士之貧者丙午分校南闈所錄皆名儒
臺使交章薦之值滁州有厚徵於椒民驥力庇之竟由此致
尼量移嘉禾丞時有海寇驥蒐兵捍禦寇遂靖有奴殺主七
人逸去二千里外驥使人捕獲之磔於市癸丑擢比部郎奉
赦讞獄江南平反者數百人遷甯國守會織造御用歲幣故
事先獻機樣屏絕一無所取中貴責貢梨栗甚橫驥調馭有
法不致擾累壬戌入計與卓異宴旋擢觀察副使督學粵西

崇雅黜浮先行誼而後文藝士翕然化之會當軸者求賄驥

曰吾憲臣也而以賄庸尙靦顏爲人師耶遂解組歸全嘉甯

皆建祠祀之年七十有六卒於家

據韓日續撰傳修

曾道唯字元魯登萬曆二十七年己酉鄉薦明年庚戌進士
授刑部主事轉郎中凡會審大獄皆持正論孤介自守不交
權要出參常鎮兵備轉山東臬使尋以病歸天啟間起江西
右藩時魏璫用事道唯力辭不就崇正間起浙江右轄湖廣
左布政使適流寇披猖單車涖任催餉解運遂有湖南之捷
是時楚王府將軍中尉祿米外庶宗口糧悉多虛僞道唯釐
剔濫冒歲省公帑數萬金以親老乞侍養郡荒旱捐助賑濟
鄉人賴焉先是南海縣向有定弓加賦崇正三年道唯與兵
部侍郎郭尚賓等公揭兩院疏除以他邑沙坦抵額加賦遂

免居鄉勤慎非公不謁晚年究心岐黃得存養之法卒年七十有六有介石齋詩稿傳於世

據南海志修

郭尙賓字朝諤萬曆二十八年庚子鄉薦三十二年甲辰進士授吉安推官丰裁清肅攝府篆及廬陵吉水安福諸邑罰鍰浮耗一切不染秩滿行取授刑科給事中遇事輒諫諍如請枚卜儲教福王之國瑞主婚禮釋滿朝薦王邦才卞孔時楚宗之彙復勞養魁梁斗輝鍾聲朝三孝廉皆朝政之大者也尤憤中官之橫嘗因事論稅使李鳳高宋潘相頗稱敢言中官呂貴假奸民奏留督浙江織造再登提督九門誣奏市民毆門卒下兵馬指揮歐相吏邢洪辱御史凌漢翀於朝尙賓暨同官劾之帝釋洪不問漢翀為廢將凌應登所毆洪復曲庇應登翟鳳翀抗疏極論貴登洪三人罪帝大怒謫山西

按察使經歷而是時尙賓亦上疏極言比來擬旨不由內閣託以親裁言官稍涉同類輒云黨附將使大臣不肯盡言小臣不敢抗論天下事尙可為哉乞陛下明詔閣臣封還內降容納直諫以保治安忤旨謫江西布政使檢校閣臣及言官論救皆不納二人同日謫官時稱二諫光宗時起為南兵部主事轉大理丞署寺事壬戌充讀卷官甲子晉太僕卿遷江西巡撫累官刑部右侍郎以不附忠賢削籍崇正初起為兵部右侍郎視師都郊催戰禦敵多所建白積勞卒贈尙書子葬祭宦京邸時倡修嶺南廣州諸會館為粵士居停之始有疏稿文集藏於家祀鄉賢

據明史翟鳳翀傳
金通志南海志修

潘濬字季深幼穎悟萬曆二十八年庚子鄉舉辛丑成進士授江西安福縣縣多巨室田賦不均濬定以丁從糧起貧富

無所偏累誅劇盜禁愚民服毒草治悍僕叛主者與爲約法
邑民讐服軍匠逋役著籍以稽之在任七年擢兵部主事改
山西道御史首疏澳門諸番爲嶺海肘腋之患又疏減粵東
稅銀奏止續差粵東收稅阮監出按貴州時苗仲梗道殺人
越貨奉命擒剿諸苗斂戢尋以艱去所積贖錢二千餘金悉
捐修平壩橋道路丙辰服闋卽差按雲南次墨吏禦狡彝發
奸弁懲狂士蠲貢金以贖鍰四千置學田有嚴解元者其妻
曖昧事發同年李嗣淳生理之濬力正其擅殺之律天啟壬
戌陞太僕寺少卿巡視東路歷三載擢左僉都御史甫三月
魏忠賢爲所親地出爲南京刑部侍郎未幾復改北時海內
創建忠賢祠違命卽逮繫濬多所庇宥忠賢知不附己乃出
爲南刑部尙書先後雪冤抑無算有太學生倡建忠賢祠濬

嚴正其罪以病乞歸至豫章卒安福士民縞衣冠出奠濬爲
人負氣節有膽畧遇事不動聲色居家片刺不入公府所居
鄉兩江潦漲田廬淹沒濬請兩臺捐鍰增築良安圍二千九
百丈至今蓄洩有賴卒贈太子少保遣官諭祭葬祀鄉賢

海志
修

吳光龍字用潛萬曆三十二年甲辰進士授江西餘干令裁
決庶務老奸斂手徵課不取羨耗建水次倉於省以便里甲
解納月課諸生皆服其精識移永豐治如餘干內艱去服闋
補北直邢臺邑本瘠衝加以水旱民貧賦逋奸宄竊發光龍
設法撫綏考選江西道御史多所建白巡鹽兩浙蠲逋課以
蘇竈丁清案牘以釋冤獄旋外補蒼梧道副使時馬劄竊發
流劫郡邑光龍繕兵爲備陞尙寶司卿歷太僕少卿差賚滇

詔道出楚中遘疾卒家居時闢西疇莊賦詩談棊片刺不入公門至讓兒產立宗祠皆爲鄉里所式云

據郭通志修

李待問字葵孺登萬曆三十一年癸卯鄉薦甲辰連捷進士初授連城知縣下車蠲浮糧五百餘緡息鄉民累歲聚訟邑有虎禱於神虎患息調沙縣縣多逃亡招徠盡復再調晉江免雜餉千兩表先儒羅仲素李愿中從祀己酉分闈得士半捷南宮三邑士民並立祠祀擢禮部主事調吏部歷文選郎中覈權璫冒濫選例時政府連函代致卻之遷奉常陪從南郊丁內艱起陞僉都御史巡撫應天時魏璫煽焰中外頌功德生祠遍吳中蘇郡留都等處當孝陵周道者凡謁陵守闈輒先責拜璫祠待問抵江甯詣陵畢卽疾馳履任不肯附媚後先封章如黃山民變三王之國漕糧過江璫意所注者待

問不涉一語松徽等郡復呈建璫祠待問並格之正色曰名節安得棄置若此遂杜門謝病崇正改元擢總漕務璽書褒嘉先時漕法濡滯待問爲整飭之漕入淮督發比先年早至數月閣臣入告有曰年來復祖制者僅見漕糧一事可謂留心漕務矣秩滿晉戶部侍郎仍督漕務題塞河決修陵隄請卹蝗潦減疲邑催徵至犒兵造礮賑飢築壩皆盡心力爲之逾年拜本部尙書召對多所籌策以二品考滿蔭子賜銀兩羊酒數召對賜坐御札第書計臣而不名隆眷冠諸廷僚嘔心竭力至是遂痿仍力疾視事上遣太醫院堂上官診視病甚吏部代疏詔馳驛回起戶部尙書管都御史未幾以病卒待問端偉廉恪敏毅忠孝家居如設忠義營修通濟橋文昌書院復省城古路築赤岡塔復本邑丁口舊額揭造賦役全

書皆心力純篤前後推都憲三家宰三枚卜二所著有史涉
 詩集文集署銓典銓總漕籌計疏畧子象蒙國子監博士赴
 闕請諡得賜忠定象家恩貢象頤司務孝問字萊孺南海志
字懿衷
 待問兄少負異質端凝簡重十歲通易能文萬歷庚寅童子
 試首拔食餼郡庠畿省十一試兩登乙榜光宗御極恩詔郡
 邑選士學使者首舉以應成均部考知縣候選趣裝時弟待
 問以馳命偕行抵德安行臺病卒年五十四遂輿櫬歸生平
 才識過人留心世務備禦濠鏡議減定弓建立忠義營并囑
 撥南泉庵傍山涌婆溶等田送文昌社學及敦睦宗祠獎學
 助祭鄉族賴之與弟待問同祀郡邑鄉賢子長象震副榜仲
 象孚從化歲貢季象隨恩貢生敬問字翼衷待問兄授光祿
 寺署丞賦性警敏事母至孝孺慕終身年五十母死哀毀骨

立廬墓盡禮訓教子姪嚴厲方正里人彭毓吾寢疾寄其二
 子并橐中所存六白金乃為其子治生延師西塾後俱為諸
 生業師霍良濬死遺孤方在襁褓為治喪撫子至於成立丙
 戌海寇披猖捐貲築柵鑄銃鍊勇地方賴安戊子歲大飢復
 蠲產乞糴以賑存活萬餘晚年築圃林下詩酒陶情所著有
 嚼蠟諸篇卒年七十八子象豐領鄉書陞問字晉衷待問兄
 少聰穎能文萬歷癸卯與弟待問同科舉於鄉會試置乙榜
 癸丑授博羅教諭擢南雍學正遷棘寺司務轉刑部員外時
 魏璫竊柄戶曹李桂明以事忤坐辟熱審同事噤不敢釋陞
 問奮筆曰限內贓完得釋恩例宜然毅然出之疏上鐫職追
 奪崇正改元置璫於法復陞問原官還誥命恩詔錄用同寮
 輩起或勸上章自白陞問曰京華夢斷矣賦閒居以奉潘輿

有餘適也構遜園與舊遊詩酒倡和二年卒弟應問字俞衷登天啟四年甲子榜

據南海志修

梁士濟字遂良捕屬人弱冠登萬曆三十四年丙午鄉薦天啟五年乙丑成進士授奉新令調清江邑極煩劇士濟政務清簡待士大夫有體人不敢干以私讞獄矜慎不苛識楊廷麟於諸生中果以文章忠節名海內分校所得士皆知名崇禎壬申內擢江西道御史轉浙江道巡視中城癸酉巡雲南丁外艱歸值閩寇劉香寇內地總督熊文燦造籌士濟力拒撫議竟滅之丁酉補浙江道御史巡按四川時寇賊充斥士濟抵成都覆覈功罪除貪墨吏革火耗黜青衿言有司德政者風俗丕變寇遁民安庚辰巡按北直隸鋤閹宦劾宗室糾外戚不避強禦奉勅監軍山海關核將領籌兵餉值旱蝗禱

雨輒應壬午掌河南道侍經筵四疏乞休歸入西樵山居累

晉高秩皆不起卒年七十有七

據南海志修

龐景忠字孝移萬曆三十四年丙子舉於鄉初令湖廣京山時徵辰沅兵赴遼所過橫掠比至境景忠單騎逆之士民遮留欲閉城門景忠不可視沅兵有一二白衣冠者因呼而問之曰爾何為者曰國喪曰而尚知有君乎曰然又問爾去何之曰還家曰而尚知有親乎曰然因諭之曰京山彈丸無糧無兵今城闔不閉恣若等所為聽吾言當給一飽必行焚劫不若且殺知縣開襟引頸示之眾羅跪誓遵約束移營去民得安堵在任興利除害案無留牘二膺薦最旋丁外艱服闋補閩歸化令遷留都司城城役率亡命包充捕盜為盜景忠摘發如神奸猾屏跡晉南戶部主事監兌革除供億會糧闕

兵譟解糧至日已晡欲不即散恐益譁散之日晚且招變乃
 出聲言散糧命取米至視之大怒再取米至視之愈怒曰甲
 士枵腹奴輩坐飽侵欺如此糠滓謂國法何痛責解者眾兵
 權呼次日畢給權楊關時漕輓火急借運民船解丁奸商相
 影射景忠至咸釐剔之又奉加二新賦景忠軫商因減其半
 以羨為補請曰公家苟完商困可蘇私囊奚恤哉乃悉允行
 其應變濟時之才如此以母老乞歸屢徵不出兩修邑乘營

建雞頭橋今稱龐公橋云

據南海志修

陳熙昌字當時號果菴沙貝人祖紹儒有傳父宏乘熙昌與
 兄熙韶同應選貢入南雍萬曆三十四年丙午解元與弟熙
 陽同科四十四年丙辰進士除平湖知縣在任六載未嘗妄
 撻一人或干法紀輒霽顏諭之捐羨金貸贖緩寬徭賦減貼

役編審最稱弊藪熙昌先清官戶實田照例優免以溢額者
 充役不及額而取寄莊以漁利者盡數還民役田遂溢四萬
 二千有奇歲歉穀貴平糶賑卹擢吏科給事中天啟四年子
 子壯典浙江鄉試發策刺閹監魏忠賢怒假他事削子壯及
 熙昌籍熙昌時亦疏劾魏忠賢崔呈秀權璫忌之崔入淮南
 賄奪粵行鹽力爭之魏崔益謀荼毒崇正改元起吏科尋卒
 贈太常寺少卿祀平湖名宦郡鄉賢據南海志浙江通志
 明史陳子壯傳合修
 區慶雲字子卿父次顏字德愚嘉靖乙酉鄉薦新蔡教諭甲
 子典試山東得解元王象坤尚書趙世卿稱得人擢知北流
 徭賊犯城督兵斬邪留茅田賊數十人賊竄去巨猾楊紹芳
 為一方蠹立斃之遷養利知州以憂去嘗發左江永利簿李
 某賍私竟為所計落職家居二十年結廬粵秀山下著有甯

野堂稿慶雲淹博能文優吏治時有疑獄連年不決司理賈卷造廬以請條析瞭然聘修邑志郡志通志登萬曆三十四年丙午賢書會試屢中副車就教宜興甫履任聘修常州府志以忤勢璫左遷滇倅興利除弊所至建祠尸祝兩臺交薦報遷引退歸著有定香樓集二十卷及古文世編歷代大文章四書纂註傳世

據南海志修

陳熙韶字仲慈號蘭砌紹儒孫也弱冠同弟熙昌貢入南雍與邵景堯輩雁行祭酒馮夢禎賞識之稱嶺南二陳領萬曆三十七年己酉鄉薦授梧州府同知威惠並行攝守合篆權梧廠校鄉闈拔張茂梧領解聯捷稱得士督援黔師入省嚴紀律無驛騷陞南戶部員外筦庫十議釐弊森然積羨千緡悉捐餉遼轉郎中出守思恩府九司故桀驚前守率徵漁土

物熙韶一無所取九司威懷奉令惟謹歸五羊祇垂橐耳杜

門恥干謁不苟言笑祀鄉賢子子履以恩薦拔縣令

據南海志修

唐夢鯤季華堡人中式萬曆四十三年乙卯舉人歷知仙居天台富川分水四縣在富川有撫猺功四川有礦徒素為奸盜又湖南江華公行剽掠兩省督撫發兵夾剿諸猺逆拒官兵敗屺夢鯤力持撫議單騎入峒招諭猺人俯首聽命由是權要息之謫池州經歷左良玉擁兵十餘萬自武昌順流而東所過焚掠湖口彭澤皆陷而貴池適當其衝當事知其才委署縣事良玉兵至鄉民奔入城守者拒夢鯤令悉納之捐俸米以食之民甚德焉吏部尚書鄭之俊池人也嘉夢鯤能調知寶雞縣事時賊已過潼關星馳抵任力禦之岐山隴州殺掠甚眾而寶雞無恙未幾李自成據西安三秦相繼陷沒

賊且逼縣夢鯤知不可守一日晨起慷慨謂其僕曰吾力竭矣惟一死以盡吾職耳乃自縊死時崇正癸未十二月十八也上聞贈光祿少卿賜祭葬祀名宦鄉賢

國朝賜諡節愍

據南海志修

關季益字小謙萬曆四十三年乙卯舉於鄉己未登進士即請假養母三年無謁銓意母力趣之行乃赴選授江西新建知縣建江省附郭謁候供億日無甯晷前官行事悉聽諸司頤指季益視民之所便者自行興革加意噢咻捐俸薪抵贖五百金代完遼餉矜恤囹圄時親察視稍有可原則力為湔雪有仇生與督學年家爭產牒發縣訊季益按以杖報督學覆核改配并加捶楚囊頭垂斃諸生遍懇諸司莫肯引手季益立命破械食以淖糜乃謁督學抗辭代辨督學見其誠懇

始聽寬釋任僅年餘撫按及鹽餉漕三院交章特薦為江右循良第一時恩詔厯俸僅二載經薦章者始得與覃恩季益俸計十三月遠未及格撫按又以治行卓異特疏題請得破格邀恩甲子分考出闈即抱恙告歸舟行數日遂卒士民間訃巷哭馳奠護喪至嶺乃返

據廣州鄉賢傳修

謝雲虬字起東天性孝友蚤歲失怙事母與大父母唯謹萬曆四十七年己未成進士未謁選即請表揚太淑人節義奉旨建坊初授行人三使藩封轉職方司主事時當流寇作逆雲虬詰戎籌伍動中機要未幾養痾里居將終身焉建祠以崇報本春秋享祀必垂泣念王父母劬勞撫教未邀寵賚遂再出轉武庫員外遷武選郎中尋轉浙江副憲清勤祇慎陞江西大參越人垂涕攀轅立碑頌德值流寇蹂躪楚地逼近

江州雲虬躬自訓練治戰具葺戰艦勵士設險日無甯晷西
 江半壁屹然長城積勞邁疾卒於官祀名宦生平坦直待少
 賤必溫肅尤喜薦拔善類昭雪冤抑凡桑梓利害不避勞怨
 侃侃言之有力不能喪葬婚嫁者捐貲助之好行其德多類
 此

據南海志修

關捷先初名捷元字甯後號蓬石由高明隸籍南海天啟元
 年辛酉弱冠舉於鄉甲戌成進士初令上饒縣當八省之衝
 土瘠民疲殫心撫字為江右循良最歲大旱露宿步禱甘霖
 立沛先是飢民譁動捷先片言定其變尋丁內艱起補廬陵
 令壬午舉卓異癸未行取例應留部廷議以入覲廉吏悉試
 畿輔山右彫殘邑捷先遂晉級仍署萊陽至則建城築堵瘞
 骸施藥甫半歲哀鴻悉集甲申春內轉吏部主事次德州聞

變歸丙戌後隱居西樵年未六十卒

據南海志修

鄺曰廣字居節扶南堡人未冠應童子科冠軍崇禎九年丙
 子鄉薦踰年丁丑進士授湖廣襄陽府推官時流寇充斥督
 糧防灘著有勞績十四年二月流賊張獻忠令人假督府軍
 符誑入襄陽城張克儉不能辨夜分賊從中起焚襄王府曰
 廣奉檄軍儲於荊州甫還任賊已攻城曰廣身先登陴為流
 矢所中死妻譚氏妾李氏子逢明逢泰女二俱遇害越七日
 其僕鄺茂興得屍於南門城上士民殮之事聞優卹

國朝賜諡節愍關鍾喜字岳孫號嵩臺天啟七年丁卯舉人
 性豪邁不拘繩尺天姿穎悟師禮陳邦彥邦彥復清遠使權

知縣事城陷戰沒

據南海志修

劉聯騶字佩甫由恩貢授懷集知縣鄉居值山賊流劫母李

氏被賊擄去聯騶持刃追賊手刃執母者母脫聯騶被賊殺
死妻葉氏守節事姑以孝聞一門孝義人咸稱之據阮通志修

林清字壯生庠生篤志嗜學與物坦然胸無岸谷少喪父事
母孝庶弟生方九月撫育成立物產均分弟亦不知為清白
置也叔玉房貧助貲營生生平周急恤難善事獨多鄉黨咸
推義焉屢試不第晚以詩酒自怡年五十三卒子挺芳庚戌

歲薦據阮通志修

陳鶴自號海樵山人世襲廣東南海衛百戶生而穎悟年十
餘不喜握鞭韉弓矢鬱鬱得奇疾自學為醫久之病愈棄其
故所受官著山人服踰嶺游吳越徧交海內名士歌嘯諸謔
座客盡傾為詩文詞曲書畫能盡效諸名家間出己意工贍
絕倫初至金陵將造尙書顧璘璘先一夕夢李白至及見乃

山人也遂深相結故客留最久璘嘗稱其氣雄邁跨諸貴游

恢諧似東方朔才敏似劉穆之工為瑣細藝劇忽整衣幘談

理道辨世務又大類曹陳思云據阮通志修

楊邦翰崇正三年庚午鄉薦明年辛未進士初任溧水令省

徭寬賦能愛民分校南閩能得士以最擢部曹堂考有清操

練達之語授福州郡守值軍變開誠撫諭咸遵約束遷粵西

學使以終養歸卒祀鄉賢據郝通志修

黎堯賓字廣臺少而聰敏孝於親充府庠棘闈九戰未售崇

正間邑令修築各鄉官路偕眾呈請藩司務循古道無容遷

就以傷田畝縣優獎之匾曰尙義勤公卒年七十有二其繼

室譚氏撫育七子二女子孫五代相見卒年百歲人以爲盛

德之報云據金通志修

陳全學字兼甫廣州人父奇才以明經任儋州教諭全學補郡庠性純孝母曾氏年七十沾瘋疾卧牀褥全學朝夕奉侍手進湯藥崇正戊寅流賊犯州學跪告願以身代母死賊憐之且戒他賊不得傷害孝子郡守申詳兩院旌其門據金通志修

謹案全學廉州人誤作廣州刊成後始校出姑仍之

霍子衡字覺商

王鳴雷撰傳作覺雙

舉萬曆三十四年丙午鄉試除海

康教諭累遷國子監助教都察院司務戶部員外郎中歷袁

州知府廉潔自持政聲丕著聿鏘之自立於廣州也召子衡

為太僕卿而廣州不守子衡乃召妾莫氏及三子應蘭應荃

應芷

俱生員

語之曰禮臨難毋苟免若輩知之乎三子皆應曰

惟大人命子衡援筆大書忠孝節烈之家六字懸中堂易朝

服北向拜又易緋袍謁家廟先赴井死妾莫氏從之應蘭偕

妻梁氏及一女繼之應荃應芷偕其妻徐氏區氏又繼之惟

三孫得存

蘭死時以付老僕撫之以存宗祀也

有小婢亞長見之亦投井死事

聞部院佟養甲總兵李成棟親往祭奠表其門曰闔門死節

之家

國朝賜諡烈愍

據勝朝殉節諸臣錄南海志修

陳子壯字集生號秋濤沙貝人母夢神人以丹桂枝拂其腹

曰俾爾生兒流芳百世及生異香滿室年十六試冠邑弟子

員由番禺學中式萬曆四十三年乙卯鄉試萬曆四十七年

己未進士第三人授編修同充修史館天啟元年辛酉奉使

祭南海神四年甲子典浙江鄉試發策刺闈監闈築隴落成

欲子壯書元勳二字扁於堂以示威尊曰書此當得好官子

壯卻之魏忠賢撫拾浙江鄉試錄有庸主失權英主攬權等

語爲誹謗削子壯及其父給事中熙昌籍崇禎初起子壯故官以左春坊左諭德召用父亦遷吏科都給事中病卒詔贈太常寺少卿子壯居憂哀毀服闋不入官崇禎四年辛未以資深起詹事府少詹兼翰林院侍讀學士五年壬申纂修玉牒告成累遷禮部右侍郎流寇犯皇陵帝素服召對廷臣子壯言今日所急在收人心宜下罪已詔激發忠義帝納之乃會諸臣列上蠲租清獄使過宥罪等十二事帝以海內多故思廣羅賢才下詔援祖訓郡王子孫文武堪任用者得考驗授職子壯慮爲民患立陳五不可會唐王上疏歷引前代故事詆子壯遂除子壯名下之獄坐贖徒歸闕雲淙別墅於城北白雲山復修南園舊社久之廷臣交薦起故官協理詹事府未上京師陷子壯在籍聞報成服率諸縉紳設位光孝寺

哀臨泣血幾死福王立起禮部尙書時首輔馬士英與阮大鍼朋比爲奸與子壯有隙每有謀策輒沮抑不行五月初九日聞大兵破揚州尅日將臨金陵子壯趨朝請設法守禦爲馬士英所阻不得入覲往會掌京城戎政忻城伯趙芝龍條陳守禦機宜趙芝龍曰聞史可法鎮揚州竭力守禦大小十餘戰自謂能軍猶且卒至破敗今南京人情洶洶兵微將寡各鎮之兵不聽徵召戰固無功守亦豈萬全之策子壯曰今日之所賴者非戰則守耳至云守非萬全然則尊意若何趙芝龍曰子固未有勝算然用兵而不計強弱不問眾寡是所謂驅羸羊而與猛虎鬪也事必不濟矣子壯知其有降意也辭出因念錢謙益平素交厚往見謙益曰金陵尅日受兵馬士英嫉賢妒能蠱惑宸聰趙芝龍色厲內荏心懷叵測事勢

如此將若之何謙益聞子壯言唯唯而已子壯曰今亡在旦夕正人臣誓死效忠之時乃人各一心大事去矣長歎而出是夜三鼓馬士英竟挾王與太后闔宮潛遁次日子壯始驚覺而大兵已次於金陵之北郊二十一日趙芝龍與錢謙益等出城降子壯遂微服潛出聚寶門一路訪尋駕蹕由太平走蕪湖聞王被執北去過杭州在陳華宇家得接慈禧太后星馳還粵集旅勤王懿旨遂取道南還閏六月十五日南安伯鄭芝龍福建巡撫張肯堂等擁唐王聿鍵立福建子壯二十一日抵家覲朱太夫人於羊城太夫人曰聞南京已破吾以汝爲死矣今福王何在汝何獨自回子壯爲具述君臣失散之由泣然流涕太夫人勉之曰盡忠卽以盡孝汝毋以我故藉口養親若徒知事我以生是反速我以死也子壯涕泣

受教秋七月初三日子壯見粵督丁魁楚言桂王之子永明王爲神宗孫謀與迎立魁楚曰公猶未知唐王於前月十五日卽位福州乎子壯曰福州旣立斷無更立之理魁楚曰公今將何如子壯曰肅宗以青宮而克復光武以支派而中興但願君則以卧薪嘗膽臣則以反首拔舍戮力同心上以答列祖之靈下以慰兆民之望何必以迎立之故執成見哉唐王召相子壯以前議宗室事有宿憾辭不行後遵慈訓赴召福州門人黎遂球亦以禮部員外郎召用子壯至雄府時唐王以逆宗靖江王僭亂懼其侵奪廣州也乃加子壯東閣大學士兵部尙書命與粵督丁魁楚贛督萬元吉同辦軍務不必入覲子壯遂留雄乃命黎遂球赴贛州助萬元吉爲聲援十二月初八日有山賊擁眾數千圍雄子壯率士卒登陴防

廣州府志卷一百一十一
禦出奇兵剿殺賊敗散去順治三年子壯自雄歸廣以奉旨
協辦軍務乃捐資招募得眾二千餘人日夜訓練九月初聞
大兵入閩總兵周之藩衛主戰死唐王被執汀州遣變報至
慟哭曰今福州既亡永明王現駐端州乃遣人至端州奉表
勸進十月丁魁楚兵敗還粵見子壯云至中途聞大兵陷贛
城萬元吉赴水死兵部員外郎黎遂球與弟遂琪俱陣亡子
壯聞之太息因言勸進端州事丁魁楚等擁立桂王子永明
王由榔于肇慶蘇觀生又議立唐王弟聿錡子壯沮不得退
居邑之九江村永明王授子壯東閣大學士兼兵部尙書督
廣東福建江西湖廣軍務會大兵入廣州聿錡被執死子壯
止不行明年丁丑春張家玉陳邦彥及新會王興潮陽賴其
肖先後起兵子壯亦以八月起兵九江村兵多蛋戶番鬼善

戰乃與陳邦彥約共攻廣州結故指揮使楊可觀等爲內應
事洩可觀等死子壯駐兵五羊驛連日攻廣州不克爲大兵
擊敗走還九江長子上庸戰歿會故御史麥而炫破高明迎
子壯以故主事朱實蓮攝縣事實蓮子壯邑子也九月大兵
克高明實蓮戰死子壯而炫俱執至廣州不降被戮子壯母
自縊永明王贈子壯太師上柱國中極殿大學士吏兵二部
尙書番禺侯諡文忠廕子三人長上庸兵部職方司主事殉
節時二十七歲贈太僕少卿次上延廕尙寶司丞三上圖錦
衣衛指揮使子壯所著有經濟言南宮集禮部堂稿練要堂
諸稿

國朝賜諡忠簡

據勝朝殉節諸臣
錄明史行狀參修

朱實蓮字子潔七歲能文慷慨有大志未冠舉天啟元年辛

西鄉試第三人崇正庚辰督學魏浣初薦境內人才授德清知縣值歲荒捐資賑濟存活甚多陞刑部主事順治四年丁亥八月陳子壯起兵與陳邦彥共攻廣州事洩子壯以實蓮攝縣事九月大兵克高明實蓮戰死有冬春草積雪軒集行世時同事死者黃炆元兄弟皆邑庠名士

國朝賜諡烈愍據勝朝殉節諸臣錄南海志修

劉士斗字瞻甫天啟七年丁卯鄉薦崇正四年進士知太倉州有政聲忤上官中計典謫江西按察司知事擢四川成都

推官十六年御史劉之勃薦為建昌兵備僉事南海志云初陞戶部主事

晉江西湖南參議明年八月賊將入境之勃促之行士斗曰安危生

死與公共復何往城陷被執見之勃與張獻忠語大呼曰此賊也公不可少屈獻忠怒命粹以上士斗又返顧之勃語如

前遂被殺妻張氏偕其幼子及闔門二十餘人皆死之

國朝賜諡烈愍據明史勝朝殉節諸臣錄修

謹案妻張氏南海志作妾張氏其幼子名晉云又云士斗長子然任陸川令卒於官

羅之玉江浦人汝涇曾孫倜儻有大志崇正十二年己卯舉於鄉順治三年十一月故明大學士何吾騶奉唐王駐會城之玉從蘇觀生擁立之以之玉為僉都御史十二月十五日大兵入廣州觀生自縊死聿鏗方事闕射倉皇踰城走之玉聞變追至龍津羅村岡十八日謀奔肇慶為追兵所獲聿鏗不食投繯死之玉從死於瓦窰其子追至之玉尸已不存歸奉衣冠葬於西樵之廣朗坪據南海志修

鄧務忠字子良崇正四年辛未進士知蒼梧縣有善政行取

授山西道御史巡按貴州監軍督餉貴州多土司苗彝錯處將領生事務忠惟持大體肅紀綱省訟獄裁濫費甦民困全黔賴之以平定水西功擬擢京堂權貴尼之左轉湖廣參議取道回里杜門不出

據張府志修

馮光璧字子真崇正十五年壬午舉人年十八丁父憂哀毀骨立絕暈寢塊喪葬如禮事母尤孺慕兄早世撫孤如己子癸未公車南還即隱居教授丙戌丁亥間嶺海騷攘羣盜竊發父老憂懼咸以光璧積行服眾遂聯二十四鄉推為鄉正光璧一本至誠扶弱抑強保障安堵桑梓賴之生平於書無所不讀尤研精性理樂律皇極經世諸書著有春秋訂義綱鑑貫珠錄雪澗集卒年六十八

據張府志修

楊景燧字呆生廣州後衛指揮僉事性豪邁負才氣博覽羣

書精韜鈴騎射中崇正十五年壬午科武舉師事陳邦彥以國士許之邦彥兵起景燧與楊可觀並約為廣州內應事洩大清官總督佟養甲執其母景燧出曰吾母養甲曰姑釋汝母曰景燧須臾人耳執事既念其母何不及其未死並十齡之妹釋之以暝吾目養甲釋之又為好語欲降之景燧不可笑而受刃神色夷然詔贈都督賜祭葬

國朝賜諡節愍

據巖野集勝朝殉節諸臣錄修

高為礪字啟之廣州右衛指揮中三科武舉雄姿濶論練於方畧髫年曾從遊陳邦彥謁永厯陞總兵官邦彥兵起景燧約為礪及廣州前衛指揮使張亞黑象賢並為廣州內應謀洩被執不屈與象賢同死

國朝賜諡節愍

據巖野集勝朝殉節諸臣錄修

楊可觀字龍瑞廣東東營達指揮使為人方面豐頤白皙美鬚眉說劍談兵豪雄自喜隆武時走天興上書授柳慶副總兵未幾廣州陷可觀解甲偽降佟養甲將假以兵會陳邦彥與陳子壯兵起攻廣州可觀陰結壯士分買廣州諸門將斬關以迎養甲嚴邏重購諸大姓與城外耳目可觀之家奴以私事懼發覺且利購金乃具首內應事謀洩養甲執殺之桂王贈都督賜祭葬

國朝賜諡節愍

據巖野集勝朝殉節諸臣錄修

霍師連字連生韜之元孫也師事陳邦彥隆武初以生員募兵勤王授遊擊將軍以功陞副總兵廣州之陷師連詐降得守三水邦彥兵起師連邀誘養甲屬官數人斬之反戈以應從攻廣州不利退至三水大小十餘戰斬首級千餘清遠衛

指揮白嘗燦舉城迎之師連與邦彥往赴列柵江上為拒守計李成棟至不得戰憤罵城上會北風大作師連出不意疾以火舟出擊成棟偽跳師連盡舟追之數里風反成棟因火舟相攻舟迫柵門不得入師連策馬渡河將走四會求救成棟追及甲重墜溺而死隆武贈都督同知賜祭葬廕子千戶國朝賜諡烈愍

據巖野集勝朝殉節諸臣錄修

霍達芳字懿誠南海生員從邦彥起兵為中軍授兵部司務永曆四年十一月廣州破達芳走文村下川之間與虎賁將軍王興凌海將軍陳奇策厚相約結二將軍分以舟師數百人使往來海上為游兵舟輕士銳出沒波濤三載一日以單舸護獲於四沙猝遇邏舟驚其存髮執之尚王鞫之不語姓名以家有老母也問曰降乎三搖其首遂遇害

據巖野集修

羽鳳麒初名騰龍字冲漢廣州衛人遠祖士夫本回回種成化時兩廣徭人作亂韓雍上疏請調南京達官軍千餘至征徭有功達官頭目士夫與馬黑麻等加指揮世襲駐廣州四衛設大小東營西營竹筒營以處之鳳麒其裔也崇正間襲指揮永厯元年以擁戴加都督同知庚寅春廣州被圍總督杜永和與諸將力守鳳麒守正南門晝夜不懈十一月三日城陷永和將家屬走瓊海諸將以朦朧邀鳳麒同去痛罵不從家凡百口禁不令出戎服自縊家悉被俘同死者有檄之浮馬承祖承祖則黑麻之裔也廣州人稱爲教門三忠其同官後死者都司崔應龍前死者守備郭瑤以三人皆非握大將權膺侯伯之封者也而能與城存亡以死報國亦偉烈丈夫云

據墓碑修

鄺露字湛若號海雪隆慶五年辛未進士彭齡曾孫也生而甘露降庭槐故名露生時不餒母乳慈師至命提眎摩頂曰天上玉麒麟也豈與人間乳氣哉以露水調米汁餒之五歲師與父命作詩應聲而就曰月浸仙人掌雲竒帝女臺清冷花院閉的皪天宇開降鶴通宵警游鴻達曙哀集靈三使至應問長卿杯年十三游泮慕墳典左氏莊騷古文不沾沾舉子業古詩宗漢魏近體法盛唐篆隸倣先秦行草倣王張舉動風致摹擬竹林絕口不言阿堵物負才不羈常敝衣跣履行歌市上旁若無人好恢諧大言汪洋自恣以寫其牢騷不平之志甲戌上元跨馬與陳潘諸公子聯騎遨遊值南海令黃熙出弗及避衝行幘令怒拘之梁御史元柱爲請罪弗釋遂通詳削其名之廣西遍尋鬼門銅柱舊蹟遊於岑藍諸土

司爲猺女執兵符者雲鞞孃書記著赤雅以紀其山川風土及女君天姬歌舞戰陣之制後徧遊燕齊吳楚所至名公巨卿莫不傾蓋延譽露家藏懷素真蹟香山何吾騶見而愛玩不已分手脫贈旣而大悔拏舟抵香山登吾騶堂欲投閣亟還之又蓄古琴二一曰南風宋理宗宮中物一曰綠綺臺唐武德年製明康陵御前所彈也出入必與俱戊子以薦擢中書舍人庚寅奉使還廣州

王師入粵露與諸將戮力死守凡十閱月城陷不食幅巾抱琴將出騎以白刃擬之露笑曰此何物可戲騎亦失笑徐還所居海雪堂環列二琴及寶劍古器圖書懷素真蹟於左右嘯歌以待騎入露死子鴻字劇孟亦負不羈才年二十餘能詩及擊劍先時丙戌率北山義旅戰於廣州東郊死之贈錦

衣千戶

據阮通志修以上南海

南海李徵霽分纂 南海梁 起初校 番禺金佑基再校

番禺史悠泰三校 順德羅 槩四校

廣州府志卷一百十七終

廣州府志卷一百十八

列傳七 明 番禺

黃哲

李德 子孚

趙介

子潔 絢 繹 純

何子海 董珣 珣子 璽 珣子

馬名廣 簡嚴

黃裳

張舉

李晟

郭瑛

陳諤

金誠

黎秉縉

龔遂

周思敬

羅密

涂俊生 子暉 孫麟 孫瑞 瑾 瑾

陳政

湯性方

何貞 許謹

韓殷 弟統 約 姪宗堯

張瓚 姪翊 翻

李正 李宗遠 李昂

何讓 鄭瓘 曾孫偉

林榮 陳穢 姪文輔

陳晟 陳道

江源 海澄

羅昕 崔廷圭

林會 張詡 何滌 容貫 張天祥 屈羣力 陳護 林高

李文 陳吳元 何廷矩

林貴 黃璋

黃昇 羅珊 子憲 忠言 孫鴻

李東 張宰 子廷臣

李翺 湯朝達

李義壯 子成性 方紹魁 子肯堂 肯構 族姪 亮工

李翰 張雲彩

王漸遠 祖文友 大父瑤 父傳 子原相

明

黃哲字庸之番禺人世為荔灣著姓弱冠而孤刻苦讀書通五經嘗借人文選手自鈔讀遂能詩造晉唐奧境愛山水結廬蒲澗往來羅浮峽山南華間度庾嶺歷吳楚燕齊一時湖海英豪皆與游嘗風雪泊秦淮遇朱文昭涂穎輩相與握手吟詠沽酒大噱二人喞曰君才如白雪吾雖知音如寡和何龍鳳中太祖駐師金陵招納儒彥丞相李善長參政張昶汪廣洋交薦哲乙巳吳國建拜翰林待制入侍太子讀書兼翰林典籤輔導盡職太子愛重之鈔幣之賜無虛日

丙午六月徐達北伐捷聞應制賦詩稱旨帝祈鍾山獲雨製
七言詩志喜命哲賡之洪武初奉使青徐論諸反側出知東
阿縣剖決如流不事苛察一縣帖服值歲旱麥苗盡凋哲齋
戒徒跣烈日中躬禱洪範池龍祠甘澍立霈民呼為黃公雨
狼溪有怪啗人哲為文禱天須與大風雷一青蛟斃水上時
毛貴亂後民多流徙聞哲善政復業者數千人洪武四年陞
東平府通判東阿民遮道涕泣攀留父老扛輿而至有百餘
歲者抵府境乃返是年河決梁山中書省發民疏浚哲董東
平役經畫有方民不告勞有司欲堰黃陵岡哲謂此元時覆
轍可以為戒事遂寢尋上疏陳時務數十事阮通志作十數事皆人
所難言帝怒會山東分省奏哲捐俸修先聖祠築積水湖堤
有成績乃釋不問哲亦乞歸既南還有司請領郡校事橫經

授徒四方至者歲數百人多名士十八年四月令還判東平以

註誤置法郡邑人爭購之家為奠祭哲始北上時倚篷聽雪

以為天下奇音妙韻歸構軒名曰聽雪篷學者稱雪篷先生

子德輿輯其詩文十餘卷號雪篷集據廣州人物傳黃通志參修

李德字仲修負逸才博覽羣籍尤善毛詩尚書洪武三年以

明經薦帝親策問賜徐大全等出身有差德預焉授洛陽典

史歷南陽黃通志作濟南今從明史西安二府幕官并能其職政暇遍覽

帝王遺墟登高作賦發其胸中磊落之氣嘗著論謂西安南

陽皆天下大形勝建不拔之基者當擇而都之江東非其匹

也士林韙其識歷郡十餘年以老乞改漢陽教諭時兵革初

息黷舍翳蓬藿中生徒十數輩野獷不可與語德言諸有司

羅致民間俊穎子弟館穀焉自是絃誦誦誦人知向學秩滿

改廣西之義甯俗尤荒陋德立法凡遇家有吉凶事當告假者隨貧富賙之孜孜勸諭使約束鄉儻不為惡習俗日美科貢漸盛當道方薦之而德已致仕歸卒於家為詩初效太白長吉孫黃笑之曰子真混元皇帝遠孫也乃力追古作者有易庵集序者以為跨晉唐而躐宋元云少嘗自號采真子著論如子書晚究洛閩之學故世稱理學必曰李仲修子字底信亦能詩據明史獻徵錄修

趙介字伯貞博通六籍旁及星官醫卜釋老之書氣豪邁與物無芥藉父璟元臨江路治中與母俱喪介遂不仕所居植二松榜曰臨清意以淵明自况時南海李韡以薦起介力止之不可臨別謂韡曰堯天雖長劉日實短子獨不為高堂念乎韡竟去後倅南康坐累乃歎曰趙伯貞真高士也介顏如

渥丹風度類神仙中人出以囊自隨往來西樵泉石間得句

投囊中不為人留題復不接達官貴人獨與八十翁劉樂善

者相倡和有司屢薦皆辭免洪武二十年坐累逮京卒南昌

舟中年四十六黎貞臨清先生行狀云二十二年己巳秋里

之遂有京行既而得白南還舟次南昌得疾卒有臨清集行世嘗偕黃哲李德孫黃

王佐結社南園人稱五先生子四潔絢繹純皆善詩文工篆

隸絢隱居不出純仕御史方黃佐結詩社南園一時名士如

別駕黃楚金徵士蔡養晦新會人黃希貢長史黃希文架閣蒲

子文進士黃原善趙安中安中弟通判趙澄徵士趙訥皆與

焉豪吟劇飲更唱迭和文士宗之而介自成一家與黃佐德

哲並稱五先生與吳下四傑同輩聲宇內云據明史列傳陳璉撰碑廣州人

物傳

何子海字百川沙灣人宋進士起龍後洪武三年庚戌鄉舉四年辛亥進士博學能詩嘗擬秋風三疊清婉沈蔚評者謂遠過居實厯丞睢甯永康二縣有百川集行世董珣者亦能詩字伯琪洪武甲子舉人吉水教諭子二匱字宗志匡字宗輔俱以詩稱匡性介特邃於易尤善草書篆隸匱永樂十二年甲午舉人金谿訓導匡十五年丁酉舉人萬載教諭擢貴州道監察御史兄弟同戊戌乙榜所謂番禺二董也有二董集自見集藏於家據廣州人物傳阮通志番禺志修

馬名廣能詩以家累充遼東開元衛軍士在衛誦讀弗輟洪武二十六年正月詣闕上言五事一遼東諸衛宜建學立師二工商雜類不得預士伍三大鄉餘地宜分屯田四兵老無丁宜除冊籍五華夏晏安宜漸收藩衛移置京畿帝閱之謂

所言有可采者但工商技藝之子不預士伍則與有教無類意悖命禮部擇行之復命吏部敘用授吉安泰和縣丞時簡嚴亦獻時務十二策帝嘉納焉嚴字公謹端重力學才智過人登洪武賢良科任南京應天府尹藍黨亂起督戰有功璽書特褒以病乞歸建文未召用不赴家居抱旗山號抱旗山人據黃通志番禺志阮通志修

謹案番禺志云明史藍玉傳二十六年二月錦衣衛指揮蔣瓛告玉謀反下吏鞫訊獄辭云玉同景川侯曹震等謀為變將伺帝出藉田舉事獄具族誅之列侯以下坐黨夷滅者不可勝數云云是時未嘗用兵任志稱嚴督戰有功未知何本姑仍之

黃裳字迪吉少從李韡游通經善文詞洪武二十六年癸酉

鄉舉入太學永樂初知政和縣遇荒歉勸富民借貧民粟官

置簿書條其姓名鈐之印以授富民約秋成石加二斗歸之

且禁粟毋出境獲全甚眾據福建通志云勸民輸粟賑貸自捐俸以償與此微異母憂

服闋部使者以文學政事薦陞禮部主事歷刑部郎中卒裳

有學識在政和嘗與典史郭斯厓修縣志論社主石之義曰

社祭土主陰氣也夫陽氣積而成天故其精為星陰氣積而

成地故其精為石石擊則星出陰動生陽也星隕則化石陽

變為陰也土為陰氣之積而石乃其精故社以石為主也時

稱善論為黃郎中集十卷據廣州人物傳郝通志修

張舉字元直家貧力學少有文名建文元年領解首署全州

學正立教嚴肅士知敬業永樂三年以學行徵為戶科給事

中選備講讀乞歸卒無以歛有司及親友賻之乃克葬云據全

州志郝通志修李晟字孟昭少孤善事母通經史有文名黃通志器宇凝重

者知其必貴建文元年己卯由南海學舉於鄉靖難初為戶科給

事中言事稱旨永樂元年三月命使廣東撫綏河源山澤間

流亡陞辭許過家省母賜道里費人咸榮之七年正月帝御

奉天門晟方奏事帝顧吏部曰吏員中多有才幹者可令給

事中保舉若非其人則平日所交結可知當併罪之晟乃奏

保郎中萬子雅辦事官前御史傅衡詔試以事皆稱職由是

益為帝所知元夕賜百官觀燈應制賦詩為人稱賞與同官陳山輩馳聲於時永樂十年進

都給事中以廉能稱擢知南甯府專尚德教歷六載梗化者

悉供賦稅以績最擢河南布政司參政所至有聲致仕家居

尤篤孝友鄉邦化之據黃通志阮通志選舉表南海志修

郭瑛字廷瓚石壁人由南海學中永樂十二年甲午舉人十六年戊戌成進士知金華縣廉明剛斷吏畏民懷重建儒學

文廟士類興起據浙江通志修

陳諤字克忠由南海學領永樂六年戊子鄉薦入太學八年

拜刑科給事中遇事剛果彈劾無所避每奏事大聲如鐘帝

令餓之數日而對如故曰是天性也每見呼為大聲秀才嘗

言事忤旨命坎瘞奉天門露其首七日不死廣州人物傳諤

歎息謂其人曰吾今夕乃為大甕所苦請其故則罵曰叱嗟汝不知耶朝廷瘞人當以養令速死耳瘞者如其言遂得屈

伸不赦出還職尋陞吏科給事中率同列奏事復忤旨罰修

象房貧不能僱役躬自操作適駕至問為誰諤匍匐前具道

所以帝憐之命復官擊搏愈力十一年奉使雲南還署通政

使司事逾年署應天府歷署刑部鴻臚工部皆能其官十六

年擢順天府尹嘗出行誤衝皇太子駕事聞竟不問十七年

四月有白鳥乳庭樹諤以獻上喜賜金帛廷臣稱賀諤政嚴

明有漢張趙風執政息之出為湖廣按察使閱三載無冤獄

前官營造未成諤為規畫民不勞而事集將代吏部侍郎師

遠有事湖廣留之督軍奏績改山西坐事落職仁宗即位遇

赦當復故官以諤前在湖廣頗撫楚王細故謫海鹽知縣尋

遷荆王長史黃通志洪熙改元封建親藩選輔導廷臣推諤

厚重老成才德兼備可用會上一日問左右大直四大字寵異之然為王所厭苦宣德三年母憂服闋黃通

居憂時郡人素服其公直有屈復為長史王與不協遂除鎮

多訟之諤諤語諸當事皆伸之江府同知時戶部侍郎周忱督淮漕檄諤修陂塘墟岸相方

設宜隨事就緒凡郡之山川社稷壇壝學校齋堂殿廡大而

新之皆有成績未滿考以老乞歸不許欲徑挂冠民遮留不得行章屢上乃允命兵部撥夫隸送還家正統九年卒年六

十八廣州人物傳中貴人阮巨奉命來廣索虎豹謂從阮飲

瘠虎使斃於路復勞百姓阮大恐置酒謝誇既酣從容謂阮聞子非闕者近娶妾是否阮請閱諸室誇遍視羣寵知其金珠也問何物曰酒即使人扛去笑曰吾故來索美醞爾阮所哀得留其半廣人至今傳為談謔錄明史列傳名臣疏琰志明史稿修

金誠字誠之尺籍繫廣州右衛讀書社學掌衛指揮麻張者最無賴遇諸塗繫之詎曰爾軍餘乃敢效儒生耶褫其衣使雍草烈日中少怠則撻之誠泣曰讀書求顯揚今虧體辱親甚矣張怒逮其父窘辱之父子相視不敢言予張數金乃免永樂十五年丁酉誠領解首明年成進士授工部主事轉刑部會張行兇奪人財逮至京師命誠鞠之張望見誠一步九

頓首誠笑迎之言於堂官釋之張造謝誠執禮如平時張感

泣歸以女妻其子誠性敦樸侍文皇帝北巡同行者視其舉動朝夕未嘗失尺寸正統初以疾乞歸杜跡公門怡情山水

詩文純雅有集行於時據明詩綜黃通志修

黎秉紘字宗冕永樂十八年庚子鄉舉為柳州訓導質直有守教授林幹嗜酒數諫之竟以醉死秉紘具棺斂得幹書囊中金候其子至付之酬以半不受丁外艱執喪盡禮服闋為惠安伯教諭惠安太皇后兄也秉紘以師道自居惠安亦克盡弟子禮惠安卒秉紘疏請斂祭一遵家禮屏去浮屠允之時公侯家多尚侈靡咸歎古禮之復見焉工詩文有集藏於家自南園結社後廣人多能詩秉紘與族叔本甯瑾暨斷事周溥敬知縣曾惟忠儒士潘翥胡悌梁棗涂俊生楊肇皆有

名繼之者趙不易何濟輩也

據廣州人物傳阮通志修

龔遂字文昌世居楊武都

以族蕃遂姓其村曰龔邊屋

永樂十八年庚子

舉人十九年進士授浙江道監察御史坐小誤降山東布政司副理問九載考最陞廣西按察司經歷景泰四年擢柳州府知府府當廣右極邊賊境要害悉心匡畧民夷安之又九載巡撫葉盛廉其持身端潔官民畏服請陞授職俸仍管府事免其給由吏部欲其至都考覈而後擢之遂致仕去初田州土官岑鏞求作祠堂記遂操筆立就牖其天性之孝卻所贄金及歸攜數十簞遇賊啟鑰皆書籍也委之而去

據黃通志柳州

志田州

周思敬永樂中知南城縣明習吏事孰察民情剖決平允不

為深文邑稱賢宰焉

據江西志修

羅密任武進主簿善撫字遇歲歉賑濟有法民賴全活督運如京師舟為風漂沒罄已貲償之卒官民弔奠如市留葬不克留衣冠葬焉禮部尚書胡濙躬為之斂恹惜彌日贊其像曰自古至今有兩桐鄉蓋紀實也

據廣州人物傳修

涂俊生字友良有文行當宣德正統間士大夫倦遊者給事張舉斷事周溥敬主事金誠處士趙絢相與為文字交以俊生為弁冕藩臬知其名禮貌之間舉耆德理民間滯牒俊生首與焉遠近皆知有所謂涂老人者有司歲行鄉飲酒禮必虛賓席待之黃蕭養反時有詔許其自新府求人齋詔往無敢應者俊生毅然行至則諭以禍福賊皆羅拜環聽嘗嫁表姪之孤者二人資遣一如己女既沒邱濬歎曰善人亡矣為誌其墓俊生子暉景泰元年庚午舉人仕韶州府通判孫瑞

字邦祥少穎悟豪宕不羈弱冠著聲庠序成化十三年丁酉

鄉試第一二十三年丁未進士第三人授翰林院編修宏治

三年修憲宗實錄成陞修撰與經筵時稱涂翰林三妙謂才

學書法儀表也宏治六年歸省抵家十日卒年四十六瑞為

文汪洋浩涵成一家言從弟瑾暉子也亦有才名成化十九

年癸卯鄉薦二十三年與瑞同榜進士授南京戶部主事監

督諸倉乞歸養遂不仕瑾孫麟嘉靖十三年甲午舉人江西

會昌知縣中坑峒賊攻城龍南縣民激變麟以弭亂功晉南

安府丞知柳州府據黃通志修

陳政字宣之生而秀穎六月能言三四齡時客以三人聚話

嘗作自訟文以勵志文云昔蘧伯玉行年五十而知四十九

奇之大馬之齒加長矣靜而思之此心既往之非奚啻伯玉也邪

夫子嘗曰吾未見能見其過而內自訟者因隳括成意固非

敢以聖人所未嘗見者自居也然雖內自訟者口不言而心

自咎之謂既曰自訟矣奚庸於辭蓋自訟而藉心聲以發之

庶或可備規鑑存觀省以示不忘焉爾其辭曰民之初生日

自天君者傳國有宋應乎大火遂以火德通于天下粵若元

默君灘之歲招搖指乎析木時天君凝神乎虛靈之宮游息

於三池之澳既而正中位闢九門宣玉音降絲綸將以咨詢

乎庶職慶讓乎百官乃命蒙撤職司觀察別枉直于疑似辨

是非于毫髮明命赫然其敢或違眩私瞽色法有攸規乃命

穰灼職司典樂遵放鄭之舊章宗在齊之正學誘知化物類

乃非經敢隳聰德厥有常刑申命卿樓納言是職戒朶頤之

貪饕絕讒邪之罔極務鼎彝之調和庶斯言之靡食申命伯

鉞屏息在公歆至德之馨香斷惡臭之靡容惟鮑魚之時遠

爰芝蘭之必歆分命叔擻為執金吾衛彼兇邪以固中都操

持恭止輕舉靡圖分命子躅為大行人奔走王事蹈循循循

惟容斯重罔情其身六命既敷百官懷慄懲既往之過愆省

平居之得失僉謀既協眾允若一爾乃推卿樓而進言于天

易之憧憧一真自如萬事由中于是乎正位凝命如初火德復興百官從令提學僉事彭琉見之

曰此潛心孔孟者也是年瓊山邱正統六年辛酉省試第一

二場後請誦所作驚曰解元屬子矣吾輸子一籌耳遂不終場而去揭榜果然明年中進士乙榜肄

業太學祭酒李時勉試之曰異材也命與商輅等四十八人

讀書尊經閣自是所造日深連遭內外艱家居凡八年以五

經授徒從者先後幾千人景泰五年甲戌成進士改翰林庶

吉士邱濬時為同年亦在選每見所拜湖廣道監察御史疏

敬天勤民十事人服其敢言尋提督北直學校立教條十五

事設簿書稽學者勤惰隨其質高下成就之以德行爲本文

藝爲末學者咸懷其德閱九載諸生交奏保留特陞山東按

察司副使提督學校如故前此所未有也先是積歲餉缺庠

序廩米折半支鈔政奏言京師首善之地以培養人才爲先

不宜吝惜小費詔復舊典京堂官缺吏部侍郎尹旻召飲指

非據敢溢涯分乎旻遽成化三年請追崇孔子謂當易大成

之號以洗前元之陋復元聖之稱以正宗人避諱之失議者

詆之遂不行是年改雲南按察司副使至則繩武弁修憲度

民夷安之十年獻績之京至湖湘遭疾致仕歸二載卒年五

十九著有東井集政資性淳厚口不言人過孝友信義之聲

洽于鄉黨博雅其餘事也據廣州人物傳獻徵

錄廣州鄉賢傳修謹案番禺志引增城志云政五世祖大震知全州歸

田番禺遷增城之沙村其後遂爲沙村人考黃佐廣

州人物傳政世家番禺之沙村時沙村屬番禺也

湯性方字行素永樂甲午鄉薦初授江南江甯府溧陽縣尉

後欽取陞歷刑部山西司主事員外郎中正統初遷廣西按

察司僉事時阿台朶兒只伯數為患上命尙書王驥行邊以性方才畧可用遷陝西行軍副使從驥及侍郎柴車僉都羅亨信等禦敵調度有方遇功賞無冒濫者加中憲大夫召見上曰清慎廉能寬猛兼濟莫如湯性方以剛直果決知名親老告歸優游林下者十餘年據廣州人物傳郭通志阮通志修

謹案番禺志性方石湖人今屬花縣

何貞字紹元沙灣人喜讀書飲酒每良夜攜童冠持釣於江歸則焚香坐牖下吟哦自號漁讀居士言行必顧道義嘗遣其子澗從陳獻章游黃蕭養叛愚民多被誘王師討養貞請持檄至鍾村招之全活甚眾同時有許謹者潭山人請於右僉都御史楊信民分兵山門岡信民問方畧謹言發倉穀以弭內變啟北關以通貿易給信牌以辨良奸信民從之賊平

脅從悉宥流離者獲全謹亦有力焉

據白沙集番禺志修

韓殷字阜民古壩人

郝通志宋魏公琦後祖文祥宋末始來居

景泰元年庚午舉

人五年甲戌進士刑部江西清吏司主事晉郎中伸冤理枉不避權要人號為韓鐵筆比之二鮑嘗鞫御史朱榮獄守正不阿及卒督府韓雍勒碑表之著雪鴻稿四卷弟統字馭民天順三年己卯舉人南安府推官從弟約字禮民成化七年辛卯舉人以教諭行蒼梧縣事俱有聲從子宗堯字希中志字仁卿宏治五年壬子舉人九年丙辰乙榜進士署柳州學正十一年分考福建十四年主考江西所取皆知名士補睢州學正晉蒲圻縣知縣丁父憂服闋知安仁縣輕徭緩賦民甚懷之正德十二年春猺賊攻縣出禦被執以大義諭賊賊不敢害越五日邑民贖之歸乃相址修城為固守計未就與眾

不合棄官去直指其門人也檄郡追留不返據郝通志阮通志番禺志湖南

修通志

張瓚字德潤威儀山立見者起敬居母喪哀毀景泰元年庚午鄉薦天順元年丁丑進士戶部主事擢兵部員外郎出知

撫州番禺志尚書姚夔薦瓚同考會試暨提學命事為忌者所沮云撫為江右大郡號難治

瓚在任清詞狀輕引錢抑豪右制奸吏不徇私謁有權貴寄

籍前官憚其勢莫敢役瓚役之如例豪右殺人繫獄請屬百

端瓚不為動卒正其罪凡詭立戶計苟免科徵隱瞞丁口影

脫軍匠與夫曹屬糧里交通富豪虐害良善併吞窮苦等弊

革去幾盡歲大旱撫以有備民無流亡成化三四年境內野

蠶成繭士民謂德化所致形諸歌頌歷數守土者以為王昇

和易王字清峻瓚兼之而文學過焉粵大記大宗伯徐瓚評瓚廉健如王祥符而仁

恕過之翰墨如周蒲田而公丁大父憂歸成化十年服闋改

守漳州值山水大發人民漂溺瓚具船救援先發倉賑濟而

後申報當道惡其專瓚曰待報乃發民死盡矣因奏減六縣

田租有差南橋為水所圯力修復之民為立功德碑又留意

學校以人士專治周易延莆田鄭思亨授以尙書多所成就

鄉飲素苟簡乃考禮正式以敦風化六年秩滿被謗調潯州

時大征梗化者總督朱英以瓚正直委管戎事瓚活民命不

下萬計逾三年以秩滿求退掌銓者迎前臺官意罷之瓚詞

翰如流筆札尤精絕著有兩山稿白沙閣其與莆陽邱御史

醉中亦有臨池興悵望名家不敢言子詡別有傳兄子翊字

廷弼性敏悟過目成誦成化四年戊子舉人五年進士南京

工部主事乞歸侍養事繼母以孝稱翊字鳳翔翊從弟也成

化十三年丁酉舉人授漳州同知為政一遵瓊舊民歌曰大

父張知府能救我疾苦少父張同知能解我瘡痍丁艱起補

德安會建王封有司程督太苛翻爭不聽致仕去翻性剛方

務適於義不以禍福介懷常攜淵明集吟咏以自况初翻至

漳州謁學有數百人伏橋下詢之曰太大人所活民子孫也

太守聞之嘆曰古之遺愛殆謂是乎據黃通志福建通志廣州人物傳郝通志阮通

志

李正字德字景泰四年癸酉舉人宋吏部侍郎昂英裔也恬

淡樂道與新會陳獻章為莫逆交成化五年自都門歸閉戶

靜坐徵辟不起及卒獻章輓以詩詩云此翁白髮已垂肩又

同載酒幾家留藥更留錢山陽笛奏西樵月蘆露歌傳大石

後還深永訣悲夫子春秋能六十故人涕淚不童兒身如南

郭人間老家有文溪地下師修短未知誰喜感天涯孤影日

其又宗遠昂皆昂英裔宗遠字希永洪武初偕弟宗諒以人

才召至金陵授之職堅辭歸士大夫美之為詩歌送其行僧

復字見心高才傲世獨善宗遠送以四絕句云三山木落雁

唳霜虎踞關頭置去航明日相思望南斗江流不盡楚天長

聞說高支膽氣昂校書嘗在白雲窗秋來椰子甘如蜜寄我

須緘五百雙太平身退更何憂歸老南山問故邱一色梅花

三萬樹夜和明月醉羅浮鸚鵡杯深泛紫霞風流

渾訝謫仙家錦袍留客春催燕開遍東園荳蔻花

少孤奉母孝謹友于兄弟宗黨稱之景泰元年母阻兵客死

金陵昂得報慟絕遂以恨卒獻章銘其墓昂長厚恬靜手不

釋卷樂吟詠春秋嚴於祀事接人無親疏一以誠云據白沙

修志何讓沙灣人郡守善承之子景泰七年丙子舉人授信豐知

縣賊圍城挺身出諭賊退城賴以全江水暴漲室廬漂蕩先

發倉廩後乃申報所全甚眾移知南康卒據番禺志江

西信豐志修

鄭瓘景泰七年丙子舉人番禺志作天順壬午科今從郭通志福建通志豐城知縣

以憂去改晉江邑多豪強俗復悍訟前令罕滿秩者瓘平易

廉恕推誠待物民風丕變宏治三年賊溫文進來寇瓘討平

之邑有陸斗門外捍大海民田數百頃藉以灌溉旋興旋毀

瓘善治牢固民蒙其利勒石紀功九載秩滿將遷邑民許端

等數千人請當事奏留三年擢杭州府通判卒於官曾孫偉

萬曆四年丙子鄉試第一衢州府同知據福建通志阮通志修

林榮字孟仁天順三年乙卯舉人七年癸未進士南京河南

道御史外艱服闋補故官成化五年按山東值歲荒設法賑

之流民復業者千餘人十年按山西劾襄王不法使者往勘

如榮言名益振提督順天府北直隸學校九載滿考諸生保

留不報十六年擢福建按察司副使巡視海道獲海賊四百

餘人二十年解官家居郡人多從之游宏治七年卒據黃通志修

陳穡字仲芳水西人天順六年壬午鄉舉七年進士南京戶

部主事侍郎王恕署部事獨稱其介晉員外郎郎中出守梧

州州當兩廣衝政務繁劇穡處之有條理總督朱英將薦之

以父憂去服闋例補故官會王恕為吏部尚書擢福建參政

巡歷所至吏不容奸晉廣西右布政使時頻年用兵處置不

乏宏治十四年與臺臣忤乞歸家十餘年卒年七十八穡方

正有禮燕會雖甚歡未嘗出一褻語從子文輔宏治二年已

酉舉人四年辛亥進士歷大理寺正剛方明決讞獄不右中

官劉瑾惡之罷歸瑾誅起知台州府不赴年未五十士論高

之著有坡山集據黃通志郭通志修

陳晟字美宣少孤貧番禺鍾定育為子舉天順六年壬午解

首成化二年丙戌進士改庶吉士將授官抗疏言臣本陳則
恭子定雖教育恩踰所生然天性之親不敢違也况五喪未
舉已二十年苟授一官義當致身終無葬日不孝之罪上通
於天將焉用之請復姓歸葬詞甚哀切上可其奏歸事定孝
敬備至未嘗言及復姓事定知之大詬戾衣冠請杖至流血
終不敢起定亦感悟待之如初授戶部主事歷郎中出知雲
南臨安府剖斷如流夷夔讐服省冗費萬計黔國公索歲饋
戾執其使囚之懇請乃免自是無敢干以私者未幾卒於官
百姓夷酋咸悼之爭護其喪歸戾為人篤倫理妻黃鍾族義
女登薦時尚未配富室欲妻之不可比黃卒作詩哀之有句云怪
殺天桃勝人世落聞者墮淚博學敏文詞論古有識讀書過
花猶得再逢春目不忘陳獻章甚稱之據廣州人

謹案南海志傳戾黃竹岐堡北村鄉人番禺志選舉
由南海學

陳道字克修番禺志作德修政從子祖天福洪武中以事戍泗州父
榮徙盱眙因占籍焉道少力學兄克正為河間教諭不遠千
里往師之天順六年壬午舉於應天七年成進士成化改元
授吏部文選主事坐累調南京刑部陞郎中清謹自持門無
私謁都人號為板陳治獄無留滯尚書周某重之令總諸司
章奏僚友有疑事成就正焉十三年丁內艱服闋改南京兵
部武選踰年出知金華府民健訟牽引輒數十人累月不決
道一訊得情有奸豪屢起大獄捕置於法宏治元年擢江西
參政歷雲南陝西左布政使所至以能著聲遷右副都御史
巡撫河南至鎮陳利害甚悉謂彰德等府與山西直隸錯處

水旱之餘民多為盜宜專設武臣陳州境鄰直隸州數百里盜所出沒宜增縣治黃河之決河南為上流而患及直隸大名府等處濬治夫役宜屬河南事下公卿議多從其言又以河南宗室太繁無賴者導之橫行不嚴禁之將為國家憂非所以全親親也十一年入為刑部右侍郎轉左尋陞右都御史視察南院踰年改南京刑部尚書獄無大小悉加詳慎十六年秩滿以病乞休卒年六十九贈太子少保賜祭葬道為人寡言笑慎取予性寬厚而臨大事治大獄持之確如也嘗書示其子曰先王所謂煦煦為仁子子為義皦皦沽名庸庸保祿近世士大夫急于進取者往往涉此吾平生俱不及人亦願汝曹效之子大章成化二十年甲辰進士南太僕少卿孫雲松以蔭歷官陝西參政據郝通志阮通志番馬志修江源字一原江村人成化元年乙酉解元五年己丑進士知

上饒縣清訟獄百姓感服遷戶部主事歷郎中清慎自將且有文譽侍講王臣輩皆推重之僉事江西綜理屯田水利燭奸刷弊不動聲色擢四川兵備副使鎮松潘夷酋饋獻一無所受守將亦敬其學行居三載廷議超擢源遽乞休歸優游泉石卒年七十二著有桂軒集據黃通志修海澄字靜之成化十一年乙未進士鄉舉無考舊志亦不載知建陽為治先教化後刑罰廣設學校誦讀之聲徧四境罷苛賦里無追呼民甚德之遷御史據番馬志福建通志修羅昕字公旦幼業春秋廣士多習他經共非笑之所力學不倦成化元年乙酉舉春秋魁著有春秋綱領及撫要諸書二十年甲辰登進士宏治間累遷貴州按察僉事以方正老練稱擢廣西副使恩威並行邊人思之據黃通志郝通志修

崔廷圭字國信員岡人孝友有才識成化元年乙酉舉人二年進士授行人奉命勞西陲三邊將士擢南京江西道御史疏通河道以利漕運居民祠之上疏請立東宮條陳四事六事四事六事今無可考謹仍舊志上悉嘉納賜織金獬豸表裏尋擢廣西按察僉事荔浦諸徭皆就撫詔加副使俸服再任以疾卒於韶陽涖官二十餘年囊無餘蓄有誠齋集十卷祀邑鄉賢據郭通志

番禺志修

林會字時見成化四年戊子鄉舉常州府通判廉恕自持民稱不擾署郡篆值採使橫斂會力與抗其黨少戢有劇盜被獲誣引富民甚眾會力請兩臺省釋人情始安九載丁內艱歸行李蕭然民追送數百里勒石頌焉據番禺志修張詡字廷實瓊子少負經濟才力行好古不為口耳之學甫

田彭韶見其少作曰嶺南孤鳳也成化十年甲午舉人受業陳獻章不與計偕者十年制府檄赴春官二十年甲辰成進士乞養病歸總督屠浦促之入京授戶部主事丁艱歸隱居二十餘年宏治十四年巡按御史黃鏗疏詔學問優長操履端慎杜門高尚不干時事部下有司速駕詔以疾辭不赴正德中御史程材王旻前後疏詔少從獻章講學祖濂洛正派為嶺南學者所宗師友淵源踐履純篤讀書求志可大用部書再下詔辭如前繼而吏部以詔敦龐博雅綽有古風恬靜清修欲忘世累薦不報正德七年巡按御史周謨疏詔議論明正事體疏通言不忘道志不忘君八年御史高公韶疏詔學有體用不為一偏之行有旨起用九年召為南京通政司左參議檄下趣上道先具疏辭遂抱疾赴南畿一謁孝陵即

告歸卒年六十獻章謂其學以自然為宗以忘己為大以無

欲為至云所著有白沙遺言纂要新會厓山志南海雜詠東

所集行世時邑人師獻章者何澹字宗濂白沙集有次宗濂韻詩云洒落儀曹

句遺名得自求如何行不顧膠向漆中投無事容貫字一之

由來得多言大抵浮結跌燔木下即此是良謀容貫字一之

白賢堂鄉人白沙集贈一之歸番馬序曰容生卓錫無地從

子游者十有一載未嘗對人作皺眉狀入京師見聲利烜赫

輒不樂語人曰古之仕將以行其志耳徒食人祿而不知恥

吾不能以一日居生之志可謂篤矣獻章又嘗至其宅有

微衣寒露肘破屋早知秋家張天祥字國卿邑諸生有答天

業憑觚翰厨煙管去留之句張天祥字國卿邑諸生有答天

祥秀才詩云十處尋芳九處空遠從溪舫訪溪翁請還几杖

歌春鳥學製綸竿弄晚風幾樹江山憐晚暮十年遊走羨兒

童張生來問衡山道屈羣力字子仁沙亭人性高曠晚築來

又問衡山孰我同屈羣力字子仁薰書院集昔年碩彥講

學其中增城湛若水在翰林時寄書勸之出并致尊酒羣力

答以詩云野老何堪太史情醇醪分注玉壺清天生我有江

湖興獨自推篷對月傾嘉靖年間郡有司三舉鄉飲賓皆以

病辭初答詩云抱病不堪沾盛典迂疏尤恐負斯文但歌擊

壤春無限垂老青山只白雲次答詩云落落巖扉掩薜蘿山

中那得聽笙歌自憐抱病難堪語祇合牽藤補舊簑三答詩

云水竹為隣白髮鹿麋同伴青藜膏肓何堪遠召掩關長與

雲棲子青野亦高尚有父風嘗結社水門村林泉幽邃南臨

獅海東接虎門天氣晴明羅浮隱隱可見有琴曰一天秋每

撫以自適陳獻章題句云鑿開魚鳥忘情地展盡江湖極目

天著有交皆隱不仕其仕者陳護字宗湯以學行稱事父兄

翠軒集最恭謹宏治五年壬子舉人為賓州教授擢知清江

名宦白沙集有答護書曰邱侍御取道還閩過白沙留語獲

頃誦已伸人洞見肺腑二公為天下惜人才公去取同此心

也侍御尤拳拳於桓溫問孟嘉之一語噫何愛人之無已也

宗湯念之一時交遊東顧西覆民澤可期遠到西望衡山神

爽飛去又贈護詩云君若問鶯魚鶯魚體本虛我拈言外意

六籍也林高字伯喬宏治八年乙卯解首任知縣有循聲李

文字彥博波羅正心街人與湛若水至江門訪獻章歸築西臺請獻

章講學宏治十七年甲子舉人試禮部得乙榜進士業太學

嘉靖六年謁選判泉州清介自守以直道忤時去官隱西臺

不復出陳昊元字乾善大嶺人宏治五年壬子舉人陸川教諭

內艱服闋改直隸南宮正德三年戊辰進士知浙江青田不樂仕宦留心濂洛之學廷臣交薦以科道召辭歸杜門講學以終

據獻徵錄明史陳獻章傳白沙集白沙弟子傳番禺志修

何廷矩字時振郡諸生以文行為督學胡榮所器及見陳獻章即棄舉子業從之遊獻章謂廷矩在諸生中齒長而賢首率諸生事我甚重之將秋試毅然舍去榮遣騎追之謝曰泉石疾在膏肓矣遂不復出著有禮意大全三卷存羊錄十卷

甘泉文集何廷矩其天資悍銳人也予昔見之於番山當其棄去舉業不就文場有脫屣名利之勢白沙先生亦高之而推之於聖賢之域然而非其器矣一日與林緝熙同坐函丈緝熙聞言會意翁喜之好向之語廷矩恟焉謂翁之於緝熙只多我一名舉耳遂怨翁畔去拜游方頭陀楊曉為師翁惡其害教語番禺高知縣瑤逐頭陀廷矩益生怨故其詩有曰我在樂盈禁錮中言逐其邪師也乃作詩謗翁名曰存羊錄謂翁空頭學問言徒有頭面無四肢譬有體無用也又謂顏會閔不得聖人之傳而得真傳由求耳黃進士若雨云廷矩所謂事求可功求成取必於知謀之末乃敢大言非古賢哲

謂周程張朱宋諸生可誅於是處士橫議之風起此廷矩背師之實也誠孝劉都閩大勲者遂與之絕交焉既而又以地理自雄同門謝天錫苦節甘貧人也然惑於廷矩之言以田十畝易銀三十兩與市地師云非吉還之廷矩不償此廷矩賣友一也夫背師賣友之人非聖從邪之學不知者與受人惑者以其小者信其大者冒置鄉賢祠若遇高明君子處之不知當何如記曰惟仁人放流之進之四夷不與同中國况可汙鄉賢之流哉據番禺志阮通志修

謹案番禺志云存羊錄今不傳附注甘泉文以俟定論

林貴字良貴成化七年辛卯舉人八年進士知進賢縣持身清慎敦尚禮教有長者風遭憂服闋補館陶令捐俸修學校又治水患緩征科蠲馬解以甦民困巡撫盛景察其政績敬禮之以薦被徵未行而卒

據番禺新志南海志修

黃璋字廷宜宏治八年乙卯舉人正德間令南康廉介自持剛毅有執立旌善懲惡牌二於要地善惡直書其名眾服其

公正卒官士哀之據粵大記修

黃昇字士超號與竹宏治十四年辛酉舉人由肥鄉教官擢

昌化知縣嘗六月祈雨芒履出禱人則焚香私第密禱如外

三禱三雨邑中虎為民害以文禱於神虎去據浙江通志阮通志修

羅珊字廷珮由南海學舉宏治十四年辛酉鄉試正德中令

永安政先愛民不畏強禦總鎮欲於縣之忠雒鄉開鑛逼脅

備至珊不從大忤使者徐俊俊誣以殺人差官逮繫邑民洵

洵曰使者貪利執我賢宰眾盍死之奔懇當道珊聲益著後

擢去民為撰文勒石竟以忤權貴解綬歸子憲亦由南海學

舉嘉靖十三年甲午鄉試為太湖知縣調宣化以養士愛民

稱次子忠言嘉靖二十二年癸卯舉人不仕憲子鴻嘉靖二

十五年丙午舉人二十六年進士知常熟縣擢御史以忤嚴

嵩歸珊子孫今籍南海據福建通志番禺志修

李東水門人宏治十四年辛酉舉人為武昌興國知州州有

豪強十餘輩東廉得其情悉置於法自是奸人斂戢訟獄漸

息據湖北通志番禺志修

張宰字體敬少有文名宏治十七年甲子舉人嘉靖元年謁

選擢第一授南京兵部司務各衛解丁補伍值風雪寒甚負

嬰多斃者宰令悉立廡下全活甚眾考滿進階登仕佐郎七

年陞車駕司員外掌黃馬快船中官進奉每踰常額宰計貢

品定撥不分毫假借蘆洲草蕩為權貴所侵一以法覈實其

直道皆此類也八年歸省逾年晉刑部郎中明慎讞獄私托

杜絕素有渴病遂致仕歸長子廷臣嘉靖二十五年丙午舉

人四十一年壬戌進士官戶部主事出知臺州陞運使清白

不愧家風云據阮通志 粵大記修

李翺字如鳳石壁人七歲父客死粵西母黃紡績課之讀正德二年丁卯舉於鄉官國子助教有師範除福建興化府同知潔已愛民設廣濟倉民懷其惠課最進禮部郎中南海方獻夫少與翺同學上議禮疏欲并署翺名翺不允以俸滿出知潯州州有稅厥涖政者私其利翺革之在官八月以剛直忤時歸據番禺志修

湯朝達字邦顯弱冠補庠生下帷講業淹貫子史學者多師之德器春容儀度整戢見善若己出惡即為之掩覆嘗被酒醒而悔即具衣冠告於祖考令其弟箠撲之誓自新因號戒所性狷介晚益貧賣其廬以卒歲巡撫某以別室館之蔬食水飲晏如也督學吳默泉張萊溪咸重其為人精於詩律晚

學朱晦庵風流醞藉與李子長頡頏而持正過之據粵大記修

李義壯字稚大松山人正德五年庚午舉人粵大記幼聰警業已露鋒銳十四丁父憂哀毀骨立弱冠就試督學首選之嘉靖二年癸未進士知仁和

縣時丞署邑久吏緣為奸義壯至勾檢畧盡片言折獄持法公平不為峭刻歲編丁役皆親自訂定終三年未嘗妄取一

介粵大記修廢舉墜鋤強植弱遷戶部主事司臨清鈔關以進羨餘七萬

受旌粵大記大司徒梁儉菴知其清慎檄改禮部儀制尚書

李時重之郝通志義壯上古文詞其時諸郎如田汝成王慎中屠應峻陸銓陳東王焯俱負雋名而獨嚴事義

益以為壯以爲十五年陞精膳員外郎主客郎中十六年擢廣西按察僉事提督學校得士稱盛粵大記嘗攝臬事革藩府守衛之暴雪郡守潘氏之寃明慎勅

法獄多平反時稱廉明遷湖廣辰沅兵備副使便宜行事先是苗人弗靖都御史萬鏜以為憂義壯至督兵直擣盧溪生苗之為梗

者以次殲滅諸若望風請降境內悉平詔賜白金文綺加俸

一級擢四川參政分守川東二十五年晉福建按察使革冗

弊清吏蠹杜請託人莫敢干以私轉右布政使陞都察院右

僉都御史巡撫貴州時方征苗規畫與總制張岳抵牾遂乞

休既歸有司造請多不報日檢閱書史為文宏博浩瀚有法

則詩亦壯麗粵大記杜門讀書絕不干謁築一室日坐其中伊吾不輟性資峭直面折不容人過嘗遊甘泉

之門晚年稿多散佚惟三洲初稿十五卷行於世子成性嘉

靖四十三年甲子鄉試第一未會試卒番禺志成性字存之初義壯娶湯朝達女年

四十八始生成性幼聰慧計偕北上至南雄感疾卒年三十二義壯葬之龍塘誌其墓據浙江通志郝通志阮通志修

方紹魁韋涌人正德八年癸酉舉於鄉知福建沙縣縣有二

狐八虎為害紹魁至禱於神一狐雷殛死一狐入縣庭死三

虎投窞其五虎匿不出紹魁率壯士入穴捕得之害悉除邑

作捕虎吟紀其事祀名宦子肯堂字子昇嘉靖十九年庚子

舉人隆慶五年辛未進士知湖廣慈利縣縣居萬山中素患

苗猺肯堂徙其城於河之陽多設方畧患稍紓會土酋作亂

當事議剿肯堂撫而諭之酋肉袒謝進千金為壽肯堂納一

猴以示意猺人喜曰得廉潔如公蠻不復反矣調廬陵有豪

家殺人捕論如法重賂不獲則請托於首輔金通志有百萬豪集亡命殺人

重賂求活且請肯堂以去就爭之遷南兵部主事歷吏部正

郎釐剔宿弊奉命賑饑聲藉藉江淮間以峻直忤時郝通志

肯堂內拒金壁外出為楚王傅王停武岡王爵肯堂諫止郝

却權勢見忤於時尋以病乞休歸橐蕭然有集行

世弟肯構由貢任侯官訓導端重有操族弟亮工肯堂同年

進士位至廣西副使聽獄明允與肯堂齊名據番禺志福建通志郝通志金

修志

李軻字文輿西壘人十歲能屬文正德八年癸酉鄉薦嘉靖二年癸未進士知侯官縣縣供億繁軻布置條約汰其無名者簿書叢積獄或數十年不斷吏緣爲奸軻置牘左右第其久近立剖之不移時悉盡御史景仲光薦其才授南京刑部主事進郎中尙書賢軻令總諸司斷獄稱平十四年出知袁州會大旱疏請蠲本年租全活甚眾屬縣萬載有龍潭上覆巨石軻詣之禱雨石忽自開雷電交作澍雨二日石闔如故眾以爲精誠所感築亭誌焉當遷入覲以不賂嚴嵩調思南令到任兩月移知平樂行至南安聞父喪歸旋居內艱二十四年卒年五十六軻隆準方面美鬚髯身長八尺飲酒多而不亂爲人內剛外和與人怡怡然無賢愚皆以爲可親及其

發施於事不以威奪不以勢靡不以利害沮既過則又若未

嘗有所爲者以克己自命號曰過齋工詩善草書爲文不屬

草而構思者莫能及有文集十卷增城湛若水誌其墓

張雲彩一作彩雲字伯起居山水之濱自稱溪山子後又結廬螺

山中少受易卽通其義善著及歷學博涉乙丙部諸傳記爲

詩效白沙體有出其詩謾人曰白沙稿雖詩人弗辨也爲人

雍頌有禮論說輒持古先里中人士稱之爲張先云閒居少

出出則整衣冠嚴步趨諸弟子或雜劇望見張先來則匿之

至則面數諸弟子侃侃無避或過其直張先曰吾不欲見諸

君爲過行人也久之諸弟子咸愧服正德末邑寇大起相戒

以張先生長者慎毋害也嘗遊京師行不流視坐不俚談人

有言倡妓事輒斥之或舟泊歌舞地令梢人徙舟避其克己

黃州府志 卷一百一十八 列傳七 奇

守禮如此 據粵大記羅司勳集番禺志修

王漸達字用儀 墓志字鴻山黃通志世居沙祖文友元末以

才行徵韜光終身 有大父則或遠孫也並存之 大父瑤長

厚能恤里父傳字希說宏治五年壬子舉人仕泰州學正祿

俸所入悉以濟諸生之貧者漸達十歲從父泰州竊取經史

潛誦與諸生談藝以聖賢學相切劘吳陵人士咸奇之父沒

橐無一錢州長貳及諸生助其喪歸母以貧欲令改業漸達

跪而泣諸父老咸為之請母乃止於是益篤志恆至丙夜讀

不休書齋暴雨至潦水盈溝忽睨而驚曰曾兩耶其力學若

此從湛若水受五經大義學日進正德十一年丙子舉於鄉

十二年成進士 西園聞見錄時首相厚齋梁公故有連也欲

薦為庶吉士而索詩文不已先生以未能信 辭之時年十九未聘 十四年授刑部主事三載告侍養家居

十餘年之泰州訪父舊徒入會稽謁王守仁墓與其門人講

學吳山久之返築室青蘿山下居嘗雜傭作躬畊樹果蔬自

給斤斤以禮讓率子弟 墓誌歸即晦匿不出察使者若溪吳

不就茗溪乃以學行首薦不報黃通志 嘉靖十四年董進第

等論薦天下人材凡三十餘人帝俞其可者十餘人漸達與

焉赴京補故官閏二月上疏凡數千言言甚剴切知者咸危

之 疏畧曰聖上聰明睿知高出前代者四事闖人不得亂政

也大臣不得專權也威黨不得撓法也學不於小而於其

大也然自即位以來治效猶未臻者何哉寬卹有詔與革有

詔而有司格不行此外臣之負陛下也大臣互相營私無復

分憂於萬幾互相排黨無復同心於匡贊或受心腹之託隨

即相負或識卑器淺罔所建明此內臣之負陛下也夫陛下

有真誠之志而臣下持以欺有躬行之實而臣下視以迂欲以

贊揚聖化其可得乎今欲求帝王之道立萬世之基其目有

五一日運樞極二日定趨向三日立規模四日鼓橐鑰五日

壽命脈此百王之會通而萬世之彝準也然運樞極其本也

壽命脈其主也至於趨向之大規模之遠橐鑰之機則因此

而維持羽

留中不報

粵大記又上乞創立以存根本疏天下仰其風采

未幾疏疾乞

休冢宰許嵩舉使人通意曰少需當進秩漸達謝卻之執政

誕日享客漸達不赴而有舊遊至款焉執政聞之不悅謂銓

部曰疏疾而燕集非欺君乎值再疏乞養遂擬旨革職永不

敘用漸達即日就道聞母訃匍匐抵家哀毀骨立服闋不復

出築樾森樓講學其中

墓誌里俗多停喪不舉至有三四世者盡捐橐中金助之凡葬二十餘棺

自是感化無有暴其骸者旋避寇省垣館小雲谷精舍與倫彥周何維栢

解疑辨難所得益深其於五經謂易非河圖春秋非周正詩

當從小序皆卓卓有見所著觀水記正學記四書邇言學庸

輯畧求仁集春秋傳日省錄嶺南耆舊傳中洞志洛澄學志

青蘿文集十數種藏於家嘉靖三十七年卒年六十一隆慶

初詔卹建言諸臣贈光祿少卿子原格原相原相字召之嘉

靖三十七年戊午舉人四十一年壬戌進士令建安以廉能

稱調閩縣革陋規治奸胥報最晉南京御史時以南臺為閔

曹相與曠放成習原相獨拾遺糾劾無虛日論漕政馬政及

嘉靖末糶政之失柄政者惡之出為甯波知府則招徠流亡

立義倉修學校遷四川副使升廣西參議萬曆三年廣東羅

旁徭賊據險作亂總督凌雲翼請討之原相監西師軍於岑

溪與參將王瑞調度進兵獲俘數千破賊巢百餘降賊四百

有奇凱還與諸路道臣勒石記功晉江西按察使遷湖廣右

布政致仕

據獻徵錄梁時徹撰墓志黃通志粵大記番禺志

南海李徵霽分纂

南海梁

起初校

番禺金佑基再校

番禺史悠泰三校

順德羅

槩四校

廣州府志卷一百十八終

